

紫峴山人全集

紫峴山人外集卷七

湘潭張九鉞度西著

從孫家弼編次

歷試偶存

禹碑釋文考

倪宗師歲試古學一名見文集卷八

嶽麓志曰禹碑在岫嶠峯霧鎖雲封歷數千百年無有傳者唐韓昌黎劉夢得因道士之見尋之不得形於詩詞至宋嘉定初何子一遇樵者引至碑所始摹本刻於嶽麓隱秘至明嘉靖初太守潘疊峯剔薛瑄傳世始知唐虞三代之書故湛甘泉一見信爲禹筆惟帝禹刻三字則後人所題顧東橋亦謂禹筆無疑但衡石疏厲碑必剝落或宋人流傳塌本林巽峯稱篆體離奇雖石鼓文原父鼎無以過

但秦漢以下知者絕少季彭山亦謂別有隱義亦未可知
惟楊升庵沈靖陽各有譯義焉升庵之詞曰承帝曰谷翼
輔佐卿洲渚與登鳥獸之門身參洪流而明發爾興久旅
忘家宿嶽麓庭志營形折心固弗辰往求平定華嶽泰衡
宗疏事哀勞餘伸禋鬱塞昏徒南濱衍亭衣制食備萬國
其甯竄舞永奔靖陽因其說而小易之謂洲渚當作水處
洪流當作魚池久旅當作以此鬱當作羸濱衍亭當作暴
昌言永當作蒸而蔡季諸公隨就譯義力辨其非禹肇南
昌揚時濤又別有所釋詞曰承帝令翼爲援弼欽塗陸
昌言端端鄉邑仔麓流船暗歇遲眠卽夙迄冬次嶽麓展
嶽北山往求山竅華嶽泰衡嵩捶事衷獻俘

少禮鬱鬱鬱徙南不幅員節別界聯魑魅夔魑竄舞燕燕
所用荒棄其如心謂禹碑非誤釋文自誤後人因
釋文之誤而遂疑禹碑之誤也夫碑之刻也蚪蚪縱橫蛟
螭擎攫七十七字懸於九千餘丈之上厯數百千年而光
怪陸離不可方物蓋禹精於治水篆皆成水流形此我朱
陵山川渾淪磅礴之氣所鬱結而成洩造化而吐混沌者
也雖起程邈李潮於今日安能定其點畫而規其體制也
哉且薑文卷尾螺書扁列籀歌趯趯冊句親輒此三代以
下之手跡也而支家望氣矜而不語况洪濛初啓圖書方
兆去倉頡作字之時未遠鳥跡蟲聲之制夫豈可手摹口
畫臨摹場泐累累乎發聲如貫珠也哉但兩者相較則升

菴之說近似而可行。靖陽青瓶寶光之夢。故鬼其說以愚人而不知其流於僞。而時喬又無論已。究之禹碑非可以譯文虛摹穿鑿爲也。後有鴻儒博士爲國霖雨者。能探幽索隱得神靈之真義。則長沙一片石將榮光起而燭天矣。問學莫先於辨志。志莫切於爲己。近者科名聲利之習深入人心。士子惟是之求。而未嘗志於聖賢之道。殊非

國家養育人才之至意。我

皇上厚望諸生體察爲己二字。而不囿於積習。故引朱子同安縣諭學者之語。親切開導。俾教者知所以教。而學者知所以學。多士有志聖賢必

思所學何事修何功之至要者何在而不徒沾沾於文藝之末庶以仰副

聖心無窮之教思也其敬謹詳言以對古學一名

歷考先王之世何其養士之周育士之至而引天下於立誠致行之學也其進德也三德六行以考之其進身也道士選士以升之亦曰吾以聖賢望士而士亦以聖賢自待也而當時爲士者非聖人之書不敢觀非聖人之志不敢存砥礪以爲貴多文以爲富戴仁而行抱義而處其不逐逐於聲利功名也粥粥然若無能也夫子不有云乎古之學者爲己猗歟休哉何風之隆也我

皇上聰明天縱睿哲性成樂育人才廣啓教思而一以爲

己爲準。朱子同安縣諭學者之旨爲訓。雖菁莪棫樸之化。辟雍鐘鼓之治。何以加茲。而多士科名聲氣之結習。未盡蒸然丕變者。豈表率之無人。而澆風之日競。與愚以爲士習之興也。由於文藝。而士習之壞也。亦由於僅博。夫文藝。夫漢重賢良。而士卽匿於賢良。士有核實之名。下無綜實之效。魏重中正。而士卽匿於中正。上品無寒門。下品無世族。則核士於爲己。而士究以爲人。汨之唐。以試賦。宋以策論。至明易以帖括。皆憑文藝以取士。而爲己之儒爲名卿爲碩輔者。多出其中。

本朝因明之舊。而增條例。杜弊端。法制大全。眞萬世行之而無弊者也。然而糊名易書。旣不辨士之品行。點經數判。

復不察士之實功爲士者窮年佔畢只從事於文詞而所謂文詞者亦只求工於帖括且恐其未能捷獲也而逐逐於聲氣之途是青衿黌序不以爲種德積學之階而以爲逢時媚世之地上日斤斤焉以聖賢待士而士自遁於聖賢也可不惜哉居今日文藝正行之際而欲挽士風於古處則所以規其所學之事定其闡修之功與夫功之至要者辨志爲己之學宜急講矣一宜倣元豐三舍明積分之法灑掃應對至於精氣入神夫婦居室達於明天察地非佔畢抄襲之虛文也必有躬行實踐之益焉果有修於家而發聞於鄉張其實而特優異之而太學之中亦以此定優劣之等使外舍內舍上舍皆知天子所重不在文詞而

在性情心術之大則敦本務實之行以茂矣一宜倣胡瑗
分齋治事之法天官河渠兵制錢鹽律數刑例之類人各
治一齋歲易而兼取之所學者專則精而易入所收者博
則廣而靡遺而棄內馳外之心以抑矣一宜倣朱子分年
窮經之法易詩書爲一科子年年午年試三禮爲一科卯年
試春秋三傳爲一科酉年試又如編年紀月律呂兵刑條
分縷析以年校其先後高下之分則治經者守家法答義
者貫經文而正誼明道之學益彰矣如是則維文藝之窮
以通之文藝之外使言爲心之聲詞爲誠所立羈縻者絕
奔競之潛蹤是卽爲人之上而引其志於設誠致行之
元王同時補救之道庶至若師儒者學校之準繩

原缺

九年考校之意而宋三仁元六齋明六堂以次積分之制
爲善也。且夫聖人之法有似迂且戲而學者之性術轉移
於不覺者。干戈羽籥擊磬歌詩是也。古者造士以爲首務
非徒習其儀以養心也。而自元以來有以爲迂且戲而不
行之者矣。今誠修而舉之不亦可助漸摩涵養之一端哉。
且夫所謂規條者。閑其心不閑其身也。和血氣牖見聞嫻
儀表。不以百司職事待學校。不以廩餼之微浼俊彥士之
循循規條也。非慕而爲利而進畏而不犯存乎規條之先
者深也。今之期望非不重範圍之者非不嚴而士視規條
之燦列若浮萍之與水相遭浮靄之與虛相接過無容心
佩焉悠悠口焉曉曉徒以縻一時之廩餼何者其心有所

不存者也。譬如水之湍悍奔激而莫可禦者，雖積之以長，焚疏之以百洫，而蕩廬舍，壞疇隰者，豈少也哉？夫教鐘鼓，陳道藝，校高下，上之能爲也。其耳聽而目視，非上能代也。況心思之藏於中，不可測哉？知上之規條以教我，也非困苦我也。玉成我也。雖師儒不至館齋舍，不考藝，盡廢所謂行藝事之條，士有不夙夜淬礪，蒸蒸於仁義道德之域也乎？不然，雖上有興學，如舜禹湯文之聖，漢明帝、唐太宗、宋仁宗之賢，又有桓榮、王儉、胡瓊、朱熹、許衡、陳敬宗、李時勉爲之師，加以三年九年之校齋舍之試甲乙科之擢，已抱其耳目心思而自遁於聖賢之林也。於上何與？韓子曰：業患不精，無患有司之不明。爲士者可以蹶然矣。蘇子曰：天

下之可以誠學而不可以勢加者士是也上之所主乎規
條之先者非具文下之應之者非僞行心馴於法法馴於
心歸於仁義道德而不自知生將見
皇上作人之意益大副菁莪棫樸之化邁漢唐宋而上焉
又何異同之足云哉

審樂以知政解

倪大宗師歲試古學第一名

鄭康成曰聽樂而知政之得失孔穎達曰所以審樂知政
者樂由聲音而生聲感善惡而起若能審樂則知善惡之
理行善不行惡習是不習非知爲政化民也雲莊陳氏曰
樂通倫理故起教於微而見端於顯愚謂政麗於實而樂
導於虛政立以質而樂輔以文故樂之一兆一綴卽政之

一張一弛也。樂之爲清爲濁，卽政之爲巨爲細也。則性反有殊，而美善有不各異也哉！後世審此者絕少，故政不臻隆古，樂不及韶箎，則知之道當急講矣。

錢法判

倪大宗師歲試古學一名

百貨雲臻，鵝眼光盈於寶局，萬方霧集，綖環彩耀於康衢。故周立九府之法，大小自有定形；漢立五銖之規，輕重豈無常制？今某全不惜銅，惟知冗局塵侵，委蝶風閒，鑪外榆花，簾隔飛蛾，星冷局中，荇葉情思，權母罔知，圓法之義，取乎泉口，託愛兄弗念。

國帑之令流若水，非青蚨之易制，豈赤仄之可疑？貫朽萬千，杖盈六十。

上林花氣賦

徐少司成月課古學第一名

維上林之巨麗超漢苑之芳菲萃九天之淑景蕩二月之
春暉並蒂聯跗璫圍錯珊瑚之幹成陰連景彤墀交丹碧
之輝喜韶光之遍引雜花氣以徐飛爾其淺深出樹高下
迎眸杏蕊爭吐桃英若揉傍薇牆而初起拂藥欄而轉穠
搖曳於繽紛之隊綢繆於綽約之儔一百五日之雨膏綿
綿乍裊二十四番之風信藹藹齊浮赤彩交馳黃雲細吹
青如舒黛紫若引綏貫累臺之細葉度複道之瑤枝夜月
涼時帶作九門之靄積晴暘暖處蒸爲三殿之霞垂入子
夜而潛聞飽含露液釀辰朝而更密薄颺煙綠蕭索輪囷
罪微汗漫若逐卷舒還隨聚散無聲而滿瑤階有色而流

寶幔濃熏扶荔。疑經百合分來。通鎖景陽。不被萬鐘敲斷。
籠綺窗而向暮。或成翠霧之空濛。滃繡徑以蒸寒。小作紅
霖之灑亂。欲奪蘭薰。爭迷桂燼。鄙鵲尾之芝檢。陋鵬舌之
玉印。畫欄曲曲。不妨度入千重。綺閣深深。何處撲來一陣。
鸞扇徐開。馥郁袞衣之鑪篆。同浮鵷班。巧覆氤氲。劍佩之
星光難認。况乃低噴錦茵。潛垂赤舄。折蕊則香在手。傾杯
則馥盈席。燕泥銜而濕惹餘馨。鶯管滑而聲流芳澤。共絮
光而羈厯。麝箔蜂隨。偕塵影以飛揚。朱輪蝶逆。如吹蟬聲。
牛妝熏舞榭之人。或逐馬蹄。一縷送歸朝之客。是知花因
氣而增媚。氣得花而添巧。鼓

帝德之綢繡暢

皇仁爲蒸，燭輝五色，以成文，進三雲而號寶，共說四年，校上衆香之國，彌深肯容，百子池頭一樹之栖正矣。

勢和體均賦

以衛恆書法華墨精專爲韻崔大司成試古學第一名

自王次仲漸改八分，蔡中郎聿開楷勢，永字八法，崔瑗授正書之先，宣示百官，鍾傳擅神明之藝，楷法至晉室而大全，閨媛有河東之二衛，姊則書帶美女，格號簪花，妹亦江左夫人，馨如芳桂，蓋其家傳曰妙品，則臻能心以慧而多悟，力以用而有恆，殫積日累月之功，乃窮變適，講書後意先之訣，實有師承，如登華嶽之階梯，攀緣累累，若構凌雲之臺榭，調劑層層，爾乃先觀其勢，則無爲險峻，止用和舒，信天真之爛熳，藏姿媚于紆徐，結構遺名，同舟楫之不繫。

方圓由我信行止之自如詳察準繩等四分九宮之跡裁
成點畫爲一波三折之書次觀其體則本伯玉之家傳得
元常之遺法嚴不相傷放不相狎五合交臻四乖誰夾中
藏稜外出力看骨肉之停勻啄速進磔遲疑必精神之交
洽鸞翔鳳翥爭來玳瑁牀前龍戲娉摩恍集琉璃硯匣爾
乃體勢相乘則觀用筆變化由心神氣閒壹開撥鐙之傳
拚出鋒之疾偏旁分布運遒勁而成宛轉回環包簡淡而
出似奇反正得秋蛇春蚓之姿欲往仍收無劍拔弩張之
失遂能擅東晉之風流繼漢人之奇墨纖波濃點錯其間
結霧霏煙備其式懸之綺閣欲成瑤月冰壺界以烏絲羣
豔金聲玉德遇籠鵝之弟子何愁咄咄逼人比戎輅于尙

書定爾翩翩生色若夫漏痕釵股詳其妙銀鈎鐵畫極其
精右軍則集成而稱聖大令亦繼父而稱名歐褚得蘭亭
之秘訣顏柳擅唐室之宏聲要皆先河而乃祭海豈真前
賢之畏後生宜乎寶泉賦之而作贊袁昂稱之而爲程也
迄今名傳藝苑跡散雲煙藐矣若凌波之宓女翩兮如姑
射之飛仙等片紙于璠璣誰沃缸面之酒想數行于夢寐
不上珍珠之船學書者果能神遊法翰摹想遺編法以兼
而妙功以熟而專又何不可入蘭臺之秘府寫青瑤之新
鐫

甘受和賦

以忠信之人可以學禮爲韻
徐大司成月課第一名

昔聖人立二端報二禮太羹不和明水爲醴深反本追始

之心植致敬備物之體使精誠交於神明知治術自有根
柢然後制六和之法采五齊之規品誰居上甘始基之陸
醢水殖天地詎違其用納牲實簋陰陽待協其宜加損不
施神氣先儲澹泊形精相麗臭味何患差池蓋甘者叩宮
而生應土而起其德運乎中央所主不偏一是包瓜含中
正之章盈缶占有孚之比饗師斟酌以齊鉶膳宰親嘗而
授匕五行之英合而化擇焉必精百物之產雜而陳視其
所以觀夫六穀六膳六清之詳壹貳再貳三貳之夥從以
類者首鹽梅輔而行者兼果蔬入豆數偶而鼎數奇配羹
居右而食居左爲燂爲醑爲菹有開必先或鹹或苦或
酸辛無施不可藹乎道味盎然天真出淡而彌旨故推而

致新守以無爲獨握一元之運還而爲質遂羅九醞之醇
繹沸變之精言理符商相辨淄澠之至味巧台齊人是以
言禮者務究厥歸皆從其朔通諸飲食之微以正本原之
學酒名真一非專觴實瓊漿食號逍遙何事膳收莊藹惟
罕譬而理明訓歸真而返樸苟其含仁抱義履信懷忠守
汙尊之舊高元酒之風悟去僞著誠之旨正施行措正之
功廣大精微裕其用太過不及準其中譬酌堯尊固引伸
之不竭如調傅鼎亦挹注而靡窮若乃性喜浮夸德慚柔
順難探制作之元以守內心之印源淺者流易枯本撥者
枝必隕文中子洪範三德莫戒貪饕段成式食品千條久
譏鄙吝無其質禮不虛行讀經言實而可信

湘江斑竹賦

以珠影爭圓顧文交織爲韻
鶴少司成雍試古學第一名

翳瀟湘之繡竹，茁異種於姚虞。傳靈妃之遺跡，超眾蔭之
繁蕪。銜香心兮迸發，挺沃壤兮紫紆。玉手偕攀，濕暈凝來
纖指。紅冰共滴，圓痕染就駢珠。遂乃蔓逮綠江，檀藥被嶺
或繞楓汀。或依橘井，旣瑣細以玲瓏。復便娟而修整，枝摩
楚塞。天濃離恨之陰，根踞君山地。老相思之境，鷓鴣飛去
弄冉冉之朱華。杜宇吟殘，委蕭蕭之碧影。蓋以節因直擢
德以堅貞，體兼縝密。質拭光晶，卻鉛華而孰涅。表幽潔而
備榮，非伏栽而臘種。豈圃藝而原耕，煙水空濛。何處可尋
題刻，巖阿岑寂。無人自賞，蕭清散成。鞅鞅層層，光與晚霞
俱耀。灑遍珊瑚點點，豔和朝日齊爭。爾乃新篁初長，舊色

仍鮮洗煩宿露。描萼輕煙深淺。互呈厥色。高低相間。其如
拭羅巾而未去。倚翠袖以猶憐。望玉輦兮不來。緘怨對啼
宛若恍。蓀橈兮忽降。含愁無語。嫣然岸邊。搖金碧之苔。千
林的。鰓波底。映楞蒲之石。五色瑩圓。况乃似東森森。如帷
轆轤穿階。而磊砢旁扶。隔澗而琅玕對截。巧勻松蘚之癭。
借點桃花之血。瑤瑟鼓時。披拂和以鸞音。瓊瑰泣罷。淋漓
蟠成龍節。春香膩粉。誰斫青光。以寫楚辭。繡箔犀簾。好漾
秋水。而團宮纈。若夫詞壇珍賞。藝苑芳芬。伴琉璃之研匣。
配翡翠之屏紋。汗簡裁之滑潤。素紉飾以纈紛。若傳女史
芳型。彤管帶冰霜之氣。倘入湘東品格。銀毫書瞻麗之文。
別有穿黃陵之叢篠。拂北渚之長梢。聽神簫之競奏。悅仙

珮之徐敲燭燄帶彩痕俱颺醴香偕丹暈相拋雲籠雁浦
之前估帆低掠霧隱漁罾之外酒旆森交是以羈客思鄉
騷人去國撫七澤之葡櫨望九疑之芳嶺入樂府而風調
踰躔譜竹枝而歌情悱惻莫不臙脂寫豔斷腸等閨婦之
花雲錦摘詞別淚入鮫人之織

秋露如珠賦

崔大司成雍試古學第一名

秋得露而高涼露至秋而甘美濃於八月之交降在三更
之始初疑作雨忽騰赤野之光漸欲爲霜先照牟尼之水
宜彩筆之形容以明珠爲比似想夫銀蟾皎潔玉宇空明
千林若洗萬籟無聲天乳旁流點金莖而錯落仙膏靜灑
澄沆瀣以團成貯五綵之囊何藉華山童子盛吉雲之器

不須方朔先生徐而結也。儼玕璣從合浦。絙來驟而瀉焉。
疑咳唾隨仙風飛下。緣層柯以墜。豈蟻穿其穴而深接密。
蔭以零訝蟬翼其珍而化。聯花編貫何異景星將瓊貝同。
懸接葉動搖不殊。玕璣與衝牙相亞。若夫鳩鵲觀前。鴛鴦。
瓦上的皦勻圓。空濛沆碭。蘸簷網而晶瑩。點風箏而滉瀟。
甯乾曉日。任綴龍旗。稍滴煙霄。卽驚鶴吭。擎自金盤。掌出。
硯石齊收。灑將紅玉簾分。玲瓏對向。爾乃低紫豐草。高繫。
長槐。問誰名爲火齊。喜遍地之瓊瑰。蘭釵綴鬢。簪斜更添。
膏澤。葉襪下階。愁濕卻惜蒼苔。荷蓋走傾笑。掬鮫人之淚。
桂漿取就。別開蚌母之胎。遠館回軒。深堂別院。捲翠幔以。
徐看。踏薜蘿林而欲遍。乞丹餽於刀匕。著手還流。尋金索於。

銀牀滑脂欲顛醉月觴邊人散筵拋碎顆千盤穿鍼梳上
更闌綫瑣圓光一串是蓋

慙恩汪濊

至德涵濡普無私於草木兆大地之豐腴儲丹邱則澤盈
軒甕潤楚脯則甘注堯厨節應四時之氣歡騰九野之衢
無俟誇三英以作瑞稱五色以爲諛也

滄浪濯纓賦

以喻際清時沐浴升朝爲韻
徐大司成月課第一名

纓之飾也尊於首水之濯也喜其清昔滄浪之漁父發鼓
枻之歌聲慰行吟之顛頽振遺俗以高情蠲垢除煩好脫
蓬蒿泥滓照軀耀首豈忘清廟統絃蓋其意在推移語識
凝滯思宇宙之昭明非和光以混世涅而不緇者守廉貞

藏以待時者通智慧有頰者弁屬青組以何年高岌余冠
綴玉弁於此際苟內美重以修能抑身澡兼夫德浴望華
采於朝端想威儀以瞻矚何必醴泉鳳水始滌塵囂若爲
金珮貂蟬太傷繁縟染碧杜紅蘅之澤遍體皆馨偕元纁
璣組而來其人如玉爾乃春雲深處晴日暄時徘徊浦漈
掬弄漣漪解弁璫而不繫出犀導以偏遲借得蘭風彈玉
指而錦波儵爚丐之荷露蘸華裾而香纚葳蕤况乃垂則
有餘卷無一掬本自晶明原非濁漉心同濯髮洵盤跡似
啼身暘谷登雲中而邁往堪膺五服五章超埃壒以遐征
卽當三熏三沐是以珍茲華飾拭厥絛繩雖薜蘿之不易
將黼黻以偕升倘壯遠遊潔紫綬而彩耀如尊章甫配紫

綬以光凝引貢禹之彈冠彙征相慶鄙齊髡之絕索笑諷
堪憎原夫郢俗工歌騷辭善喻思公子兮離憂怨美人之
遲暮惟弭節而馳神故臨流而感遇至若斷章取義別聽
孺子之吟自後博引繁稱遂入詞人之句士有生逢
景運世際

熙朝已脫鹿皮之繫將榮爵韞之招仰

紫殿朱紘之肅穆隨崇班繡組之華彩海宇咸賡鳬藻亭
衢共振鸞鑣何必溯楚臣之遺操憶南國之歌謠

惜分陰賦

以仰禹慕陶分陰當惜爲韻
倪宗師歲試古學第一名

業精以敏績課以勤程督各嚴乎志氣流光當檢乎寸分
荏苒年華共發邁征之想恬熙日月同披詰彥之文法愛

倫之曩哲。溯祗德之賢君。心逸日休。雖衍廣胖之趣。而學
如不及。宜師典籍所聞。原夫陰之起也。陽燧之精。方諸之
鬱。圓象之膏。曜靈之質。羲和捧轡。朱明沃一鏡之光。鬱儀
扶輪。大地麗三陽之澤。挾赤烏以翔空。類白駒之過隙。手
摩鯨背。驚扶若木於東雲。色帶鴉翎。旋蔭桑榆於西極。合
晡肝以遷流。移太虛爲瞬息。豈容光之必照。乃偃臥而弗
惜。羌夫元圭之主。水德之王。法天行健。與時無疆。絕距行
之影響。戒禽色之荒亡。杜儀狄之甘。恐怠宵旰於沉湎。急
益稷之拜。廣懸輅鐸於明堂。二帝鑒觀。不負百王。法守誠
當。是以南楚元戎。荆門鎮府。當凌夷於愍懷。繼凋殘於蘇
庾。庭盈木屑。心馳風雨。於中原。手挽弓弦。氣吐虹霓。於北

渚比王尊之急國叱馭遄飛似劉琨之急公聞雞起舞固
勤訓於百僚亦遠師乎大禹苦夫青燈勤讀黃卷搜尋手
不停筆口不絕吟長日罷棋薦章莫灑令狐之汗清風掃
榻北窗弗解彭澤之襟柳絮起三眠日如一歲花磚過半
刻價值千金似畱后羿之弓斡射赤輪於碧落若移魏收
之榻巧分嘉樹之深陰蓋功以倍日爲能業以及時而赴
彼日中爲市者泉刀子母之相權而日出而作者耕穫耘
耔之厥務豈有志於希天而韶華之可誤朽木不雕之誦
哲士當懲虛室生白之時媵修所慕若浪擲乎常儀或空
拋於偃仰將日計之寥寥望程途而怵怵熊肥蛙瘦之不
明太乙神君之安往燭龍笑我拂白髮以星星靈鳥嗤君

憶紅顏之憔悴返此一輪影魯侯何處揮戈逐茲三足鳥
夸父空勞曳杖夫以五車枕藉二酉翔翔愛陽光如已物
惜羲景若親操倍千丈之長途以赴驚三竿之去影徒高
明德日新固將追跡塗山之聖勳華雲擁不妨埒名東晉
之陶

賦得月中桂樹

得香字五言八韻
天鄉試第四名

乾隆壬午順

冰窟高無際瓊柯靜自藏九霄誰種植八月更蒼涼元氣
歸盤鬱仙根託渺茫風邊聞子落雲外綴花黃地入千山
影天飄萬古香鏡飛蟾魄彩粟滿兔毫霜吐翠依
瑤殿霏煙拂素裳重輪呈

聖瑞更結一枝芳

賦得秋容無迹澹平空

得秋字七言長排十六韻崔大司成雍試一名

余生平不以應制排律入集謂其不見性情也
凡應試作皆嫁他氏名收登所選依永集幾二
百首其以教弟子者皆旋作旋擲七言長排尤
嫌太顛顛此首雍試作當時都下傳寫殆遍老
錄賦稿因附收於後時癸丑暮春

井梧葉落

禁城秋寥次秋容望裏幽埃壙已經新雨洗薄陰還向晚
風收陽鳥朗徹諸天淨沆瀣高臨一氣流煙意自霏輕冷
外雲情不著遠空頭蔚藍下覆穹廬合金碧都裝世界浮
白晝銀河疑滉漾斜暉霞彩未夷猶晶明黃是昭陽瓦掠

亂紅翻

上苑溝。青女欲來鐘信少。素娥潛釀露華稠。暎來皓羽林
藏寺。吹入商聲角倚樓。薊野平連籠蠲紙。燕山突倚豁清
眸。橫鋪楓柏皆蒸錦。倒映簾櫳懶下鉤。雁字寫殘寒寂寂。
鵲橋駕處色悠悠。擬之駘蕩仍莊肅。說似蕭森又麗柔。屈
宋辭章方敢繪。仇唐畫本那能畱。太平熙皞三農悅。造化
權衡五帝謀。計日鑾輿應進狩。祥光大漠耀旌旂。

賦得露氣聞芳杜

得芳字歲試古學一名

春上江

蘼碧。蘇芊接楚鄉。風輕潛入夜。露飽靜流芳。氣自

宜蘭舫清如染蕙裳晨朝吾有伴采采渚頭香

賦得春水船如天上坐

得天字歲試古學一名

湘江春雨漲無邊高向楊梢繫客船風正帆疑遊碧漢雲
低岫自接遙天才人寓楚多奇興使者乘槎有異緣好趣
潮平兩岸濶中流簫鼓坐芳筵

終覆長沙合屬幼童余與謝子天樞建極俱首薦

限名字

府試一名
十一歲

五拜公堂興趣生堂前花鳥靜相迎看從合郡傳多士知
重垂髻在一名學淺或難遊學序恩深自可被恩榮閒驅
竹馬雙槐下一曲長歌問綠英

賦得楊柳風和乳燕飛

得飛字鶴少司成雍試古
學一名

花謝垂楊積雨稀。和風乳燕在晴暉。柔絲千尺颺空出。細
翦一雙相背飛。蝶舞乍來爭冉冉。麴塵初起弄微微。朱欄
十二差池裏。油壁香車緩緩歸。

春深蜂蝶到來稀。小物欣欣戀碧暉。學翦煙綿巡遠勢。忽
驚鈴索作斜飛。池塘綠點萍心破。庭院紅穿箔影微。漸解
呢喃娛客興。煮茶聲裏蹴花歸。

王謝堂前跡應稀。長條踈地有斜暉。喜穿新葉雙衫出。纔
露斑襟一半飛。將往翻回低舞地。欲投無力飽風微。碧天
駘宕春雲捲。簾幕相和未肯歸。

畫堂深處俗塵稀。哺養辛勤二月暉。風滿雲霄隨母出。天
憐花絮試春飛。仙人絲履林端繞。神女金釵檻外微。正是

櫻桃花落候，碧條斜拂鈿車歸。

賦得小餅桂花

崔大司成甲子決科一名

明鏡滿奩邀月姊，小

身幻影出如來。

壁間鷹

吳宗師古學一名

紙上起風霜，修翎健欲颺。如何條玉爪，不使向高翔。
品自殊凡鳥，威還避狡獪。枝頭描側目，突兀已傳神。
待得秋空日，須圖竦翮升。楚庭還見用，定使制飛鵬。

星沙春望四首之二

歲試古學一名

積翠連雲麓，飄飄几席中。上元湘俗迥，野燒映江紅。

遠靄來楓浦，輕陰覆橘洲。漁歌春唱晚，恍若洞庭秋。

湘水曲十首之五

歲試古學一名

九疑雲鎖晚山屏，夜雨零陵渾未停。二十四絃聲已絕，溟溟何處弔湘靈。

蒲帆滿拽出春汀，九面衡峯面面青。記得去年沽酒處，半洲鷗鷺接芳坭。

鼓瑟洲前沙似雪，漣江河口月如銀。分明蘆葦漁歌起，行到前汀不見人。

蕭公亭下嶽雲浮，賈傅祠前湘水流。麥飯一杯原隴上，家家解祭李潭州。

三十六灣雲作屏，君山遙點一螺青。岳陽樓上誰人笛，又

引微波下洞庭

雨中芙蓉 縣試一名

池上芙蓉遇雨香，幾枝輕帶石蘿長。
秋山一任飄零意，綠藥紅花映小塘。

嶽麓懷古 倪宗師歲試古學第一名

維南嶽曰衡，周環離宮，固朱陵七十二峯。
嶽麓收遠岫，天馬與玉虛，雲氣紛奔淩。
嵐光靄不收，隱現羅錦繡，變化生長風。
表裏吹洞透，岩壑劃然分。天外落清茂，抱黃鎖蒼藤。
太古色不漱，蒼簣翠籥，人語笙琴奏。
白鶴與蘭澗，飛泉何延袤。黑魚十許頭，落花隨漚。
虎岑拔地甘，龍谿鉢中鬪。禹碑綠字文，質與陰陽壽。
拜嶽片空青，勢欲向人仆。吹香

留古題小兩走深澗雙松裹皴炮乾坤老邂逅山鳥與山
花隨地友于富緬昔朱以南書院額篆籀維彼關與閭講
學以爲標偉哉高山監石室遺書購經義剖鱸繩鼎語豈
誼譎雅意耀日星流風披童幼如撞萬石鍾以警聾者謬
吾道與在南斯言非飣飰教化日涵洽精氣如蒸餲其閒
讀書人若矢發滿聲蒲萄架已頽靈境豈樛樛書聲接四
時膏火無虛候某生本鈍根著作愧瑛琇名山幸有緣絕
頂歌盈袖幸遇執事詢五言韻強僦敢附聖燈緒聊把辦
香艱願得沐春風會同嶽靈醕

擬懷素草書歌

倪宗師歲試古學第一名

右軍真蹟不可得桃花蘼片無顏色青天飛墮老僧人書

破芭蕉一萬葉空山酒醒月墮枝狂呼大叫走淋漓胸中
五嶽起方寸筆落萬象爭神奇或如鐵騎蹙沙場不聞鼓
角聲但見萬陣矛戟森開張或如鸞飄鳳泊五雲炯爛東
西遙錯相輝煌或如九天雲下垂四海水皆立蛟龍馳騁
而雷電爲之掀裂風雨爲之迴翔老僧之詩無俗滓秋臺
春桂老愈辣怪柏蚪松寒不死而亦草書亦如此君不見
董尙書趙翰苑芙蓉脂粉楊柳姿能令世上黃金賤僧也
涉筆非偶爾巨眼當須辨眞贋平生雙腕硬如鐵橫披愧
彼頭濡墨願驅鍾繇索靖爲爾之前鋒旭與伯英爲爾之
後策不求并州快刀翦秋水但求十日寢食坐臥臨摹吟
哦於其側

案先生雍試七古尚有前石鼓歌後
石鼓歌二首見詩集卷二都講集

筆花調限浪淘沙

十一歲院試古學作

夏雨楚江平，
簫簟涼輕漆園枕上睡初成。
午起莞然何故笑，
夢筆花生。無葉又無莖，
何處枝橫書殘如有異香迎。
爲報莊周蝴蝶翅，
莫顫風清。

男
姪 聲 有 如 泰
裕 普 孫 沃
幹 啓 豐
光 字 校 字

紫峴山人外集卷八

湘潭張九鉞度西著

從孫家棧編次

進御稿存

皇太后七旬萬壽恭紀

皇帝踐祚二十有六載仲冬之月律中黃鍾陽恭逢
萱幃七袞嘉辰屆

瓊筵大啟

萬壽瑤池觴是時崇花

荏節正

納慶

蒼穹默佑

錫

福豐穰穰泰階玉燭九宇鏡鴻朗融風珥日五色雲煒煌
洪惟

國家景運大赫奕

皇帝

文謨

武烈超軒唐丹垠朔部車書會軌則東鵜西鰈琛賁通
津梁版圖式廓五萬有餘里嘉禾瑞麥月竄皆倉
箱翳茲

深仁

厚澤所薰被咸奉

鴻慈

懿德爲宣揚

天心廼益

篤佑我

聖母珠聯璧合元日徵奇祥唐哉皇哉

德與

福臻至春臺

壽宇醇鬯涵八荒

鴻禧綿綿翼翼日孔降山陬海滋抃舞遙相望

皇帝至孝大備

尊

親典歡心萬國敬奉

璇宮長吉日

冕服

親詣

上

寶冊

崇

徽十四藻采續琳琅

龍章螭紐蟠者赤綠子與

天不老山嶽同巍昂

珠屏璘璣

撰頌辭茂蔚不數九如天保賡詩章

筵前

介

壽

御製新

綵舞嘉名喜起萬代歌明良

太平

天子

龍袞當中立金枝玉葉以次分綴行應聲蹈節叶以琴瑟鼓雲翮霞翬錦袖華裾裳

膝前

承

歡三世靄且吉

重輪

重暉

重潤兼

重光

仰瞻

慈顏

顧之大

悅豫屢

飫

琉璃九醞丹砂漿更稽泰期河昴協星瑞
敬備九老圖幘首

天潢

酌以大斗

跪祝增

純嘏芝衣鳩杖髮鶴鬚眉黃範金帝釋五百有餘座
虔噴

慈壽與佛偕無量或揚珠眉

手捧

真華誥或垂字髮

笑進

長生香或

獻天花靜示

大歡喜或合兜綿

拜頌

安寧康萬方玉帛鱗集復屬至蘭殿羅列曰符采是彰永
絲火浣鞮譯紀甌臚吉光紫鳳盈衍陳篚筐和闐
新鏤延喜玉璀璨崑崙屢進益地圖精詳其膳維
何有曰

延齡麥有瓊山稻亦有元山梁鳳飴麟髓燦爛盈匕俎
蓬池仙膾瑞自

堯厨將嘉言吉語一一

睿翰定

瑤函綺冊書

進羅縹緗其餘瑰珍耳目夙罕觀皆出十洲三島之梯
航都門西苑峒堯十餘里飛樓綺井綠以松筠廊
傑如蓬萊閬苑出層漢曲如洞天委婉探奇藏燦
如藥珠璫宮現彈指幻如蜃樓貝闕湧滄浪恒春
之樹疊吐花四照不夜之城交鏤錦七襄列厯駢
坐瓊貨胥師掌魚龍曼衍角觝鋪毬塲其內鼇山
鳳枝互戢簪齊奏簫管爭阮笙竽簧

皇帝是日

親扶

大安輦砥衝融霽

愛日熙初暘玉驄沛艾錦繡周匝匝流蘇容裔鸞鳳銜蕤
颺三百六十官屬錯簪笏億兆千萬裔國餘騰驥
元齟黃鯨

嵩呼合地動歡聲喜氣充塞

紫城闐

皇帝恭推

至仁永

錫類

恩綸三殿汜濩流滂滂

慈雲

福雨十日普函宸

堯尊點灑歌咏紛翔翔魏哉

鴻慈鉅慶

天所佑遂令

藻典景錄邁百王

天佑

聖母

寶算日增益

琅函青簡奕禩

坤維昌

天佑

聖母

徽音立繁祉

含飴

戲綵

長樂慶未央

天佑

聖母

懿福允涵育八埏六幕黎庶皆安臧

天佑

聖母

鴻圖大輦固甌平藻朗

瑞緯呈珠囊

皇帝萬歲長

進

璇宮

膳

日升

月恒頌禱亘無疆

右九言釐歌一章

章百句
五十韻

正紅旗官學教習候選知縣臣張九鉞恭

進

皇太后南巡三幸江浙恭紀

恭次上下平韻七言律句三十首

率土車書慶大同

神孫

纘

武典攸崇揮絃正叶南薰調清暑先開北塞宮已喜九賓
趨櫓栢仍看六月賦車攻詳霏甘澍休徵集甫草
年年茂在東

右一東

大嶂蒼茫接海封雨餘擁出萬芙蓉雲團

翠罕重關轉星綴

珠韃七校從葉護備藩趨豹尾呼韓款塞聽鯨鐘今年
早慰邊人望夾道歡聲看

六龍

右二冬

微颺習習轉華杠地迥天高暑氣降山護錦城連
塞九泉環

丹苑合流雙初涼蕙草香承

輦五月松毛碧映窗處處郊場收麥後

宸顏又喜見耕耰

右三江

幔城蓮漏晝長時

萱幄花明淑景移每網灤鱗

親進

膳時攀塞草

近承

怡雲山盡作千重錦，藩服齊擎。

萬壽卮共說。

璇宮

鴻福永年年此地駐。

芝旗

右四支

雲開帳殿，殿晴暉列俎，陳觴割炙肥。六服藩王蒼。

玉佩

萬年

天子袞龍衣，仰看文綺推筐出拜。

賜珠韞壓袖歸，雕眈魑顏爭忭舞。長隨尉候護封圻。

右五微

商飈八月靜長虛，十萬龍驤出塞初。天控川原成。

上園地包種落作周陸丹楓遠近番兜宅白草微
茫牧戶廬

聖世併幪真廣大朔荒何處不耕鋤

右六魚

蕭蕭萬木響崖枯圍合青冥列騎趨馬突長蚪隨
蠹落鸞爭飛電脫絛呼

大綬獨舉

神機握植櫓無遺眾志孚共仰

君王

親射虎貫顱只發一

雕弧

右七虞

按屯駢部掃虹蜺草淺林乾

進狩齊搏虎健兒穿雪出拖熊飲士帶霜捩雷喧紫漠

天驚曲日散平原上駟蹄四十九藩爭警伏

皇威早播月支西

右八齊

廣場爭進綠頭牌一網宏開仰

睿懷拍馬分嘗雕錦隊渴輦斜挂虎文鞞脫褱

御墨飛金較駐騎

宸書勒繡厓

乙夜奏章還

靜閱

批封明日下天街

右九佳

提衡六幕入春臺

帝德巍巍今古該

闕殿

孝思歡萬國

泰壇

精意貫三垓自

天眷佑

璇圖鞏率

祖攸行

駿業恢道園廣涵

洪鬯福麒麟還出大荒來右十灰

紫殿披圖豁性真苞符河洛契深醇日懸金鏡心澄

水天轉璇樞氣盎春靜識鳶魚皆法象動如風雨
亦經綸遐方

玉燭融無外豈獨寰區覆

至仁

右十一真

天威有赫掃遐氛

廟算如神集大勲侍子冠裳來赤海陪臣琛篚貢朱垠牙
旗高捲天山雪玉鉞遙開月竈雲今日旌門新鞞

鞞自來未入史官文

右十二文

車師猶是內名藩拓宇新周絕域繁慈嶺西來名
印度黃河東指隔崑崙雲騰宛馬歸

天廐香送葡萄入玉門見說

萬年延喜至和闐，
握載盡瑤琨。右十三元

伊吾直望繡漫漫，
牙帳連屯類海寬。
驃騎將軍皆栗吏，
安西都護盡田官。
雨濃禾黍連山熟，
日落牛羊散磧寒。
自是幽風歌不到，

御屏寫作畫圖看。右十四寒

王會遙通拔達山，
承

恩新綴

紫宸班手牽露犬，
低鏤耳表寫砢鱗。
貢白環伯克久膺
珠韓貴，花門齊隸羽林嫺。
援旗請奮當時事，
筐篚何辭入玉關。右十五刪

敷天望

幸切南天

三舉

時巡到海壖紅杏雨中迴

翠蓋碧桑晴外映

珠船

觀風每切陳詩典

端本常垂課吏篇栗帛堆筐歡父老

慈顏有

喜似前年

右一先

尖山塘接塢山遙勢捍滄溟氣不驕采駐

辰旒輝日月

詔加槌石壯雲霄。秋風澤國肥蒲稻。春雨人家漉蜃瑯。
重潤

安瀾應有瑞。不須強弩射鯨潮。
右二蕭

馮夷効順久無虢。

廟畧周詳

駐翠旂尾閭

特籌諸壩洩。鰲源深濬六河交。錢飛粟府虹橫柳岸落。

桃花玉作菱。五色榮光應疊出。金隄萬襪輦桑苞。

右三肴

深官

宵旰

念蓬蒿歲歲

蠲租廣

沛膏粟出

神倉賙萬姓

帆停漕府截千艘

聖書

賜吏安鴻戶郡國

詢民走繡袍

慈德豈惟超奕代海深地厚與

天高

右四豪

畿南水利醴諸河溝洫周官蓄洩多方畧按圖如

米聚重臣履畝似星羅。麥陂遙落魚陂翠。海口長流淀口波。豈獨鄭渠將

獻頌。永令瓠子不興歌。

右五歌

闕里峩峩檣影斜。

飛龍屢駐彩綈衙。岱宗仰止同

心體。泗水通源亦

聖涯。

功德自然

承道統。圖書隨處發天葩。

告成

大武豐碑在。長麗橋門五色霞。

右六麻

鄒枚賈鄭一時良

虎觀

鴻都滿珮珩周室

作人原

壽考虞廷敷奏在

巡方隔年喜見鴻達展

三度新添

鳳詔香四海珊瑚歸網後星塵夜夜朗文昌

右七陽

宸謨珠璧自天成藝苑長垂雅頌聲百代文章歸冊府

六經日月在

延英

折衷盡斥諸臣陋

染翰還兼八體精

典學尙聞

淵量切

講筵時啟

御香清右八庚

天縱

聰明卽典型

幾餘

制作邁前經。鑄鐘南出江。騰彩玉磬西來地。效靈笳鼓

曾歌饒吹曲。笙簧盡叶劍刀銘。

松軒更定

同文志萬國聲音在汗青
右九青

坤輿安止

惠黎蒸

錫類

推仁

盛典增封禪不誇蒼玉檢冊文

親筆紫金藤椎牛鐵夜千夫膳舞鰈滄溟十月冰自是

宸遊困

震出祥光馳道頌

升恒
右十蒸

崇

徽藻采碧蟠膠

寶冊琳瑯耀

帝州

玉闕風雲趨鐵馬

天池日月接

金旒海浮一點爲仙樂秋淨千山聽戛球信有

孝思通

孝治

秦階如鏡介

洪庥右十一尤

十年三度

翠華臨鳩杖重瞻冀

澤深佐酒沛中佳子弟攀

轅前歲舊蒼黔砥衢融霽觀成化翮羽祥林待好音到日

親扶

大安輦貢珍麟集

慰

皇心有十二侵

潞河

親謁

霈恩覃

色笑

歡承日

侍三江燕初翔依

鳳艗澤鴻爰及

駐

鸞駢綿區挾纊羣藩囂

禁箴栖糧七萃涵

行過稻畦

豐澤近更從

觀稼課農蠶

右十三覃

春暉

珠殿

福疇添花漏長時報曉籤浙水

豫遊煙翠馥吳山

臨詠墨花霑

金甌鞏固惟耕斂

玉燭調和在

養恬

慈壽競偕無量佛大千世界證華嚴

右十四鹽

薰絃解阜叶

韶咸

皇史分編進

匭函寶璽器車三島徧

慈雲

福雨九霄絨六年

慰望添新諺萬國懷柔信去帆

天佑

聖皇

純嘏

錫

璇闈長

奉有

神誠右十五咸

如泰

沃

男姪

聲

有普孫啓

豐

校字

裕幹

光

紫峴山人外集卷九

湘潭張九鉞慶西著

從孫家棧編次

花農雜咏

畢大中丞沅展祀嵩嶽禮成恭頌五言排律六十

韻

有序

歲逢柔兆支應敦牂我

皇上春仲時巡臺懷禮佛惟中丞恒陽馳赴道左迎
鑾章服旌庸尙衣寵錫

奎文親揆雲漢昭回念嵩嶽爲望秩之區值甘澍有
效靈之應用咨大吏往展明禋舊日廟工兼宜
閱視於是中丞吉蠲首夏祀肅靈祇減騶從以

遄行尅程期而歲事時則圃田新雨麥穗垂黃
驄岫濃雲渠流漲翠柳邊數騎初聽栗畱花外
雙旌不驚雉雉夾道梁香而抃舞羣真抗手以
來迎主則齋祓熏壇虔誠進帛金泥芝檢遙呼
萬歲聖人寶冊珠函仍謨九枝如意

御書璀璨東西紫極星垂帳殿崔巍咫尺蓬萊日近
降霞輶之縹緲羽衛如雲瞻蘋藻之跼將臣心
似水爾乃二室龜收萬峯晴霽泉香五乳仙呈
石髓之膏貝樹三花佛現迦陵之鳥御風丹磴
翱翔獨上天門躡屣中峯呼吸儼通帝座仰
宸章赫奕五雲高捧龍趺望

睿藻繽紛。雙栢飛擎。鳳翼欲共浮邱。把袂石室。聽笙
如探蝌蚪。盤文金壺。瀉墨昔坡公至。而詩句逢
仙。永叔遊而天池。續詠茲承。

諭旨。遠邁前賢。况復兼治神人。用和上下。雕甍玳閣。
聿新及彼華坊。峻廟高壇。補葺壯乎周道。規模
釐正。撤四岳之旁祠。文教振興。拓二程之講院。
祀易風雲雷雨。樞紐天功。訓詳簠簋。廉隅提撕。
吏治仰承。

聖意用以錫福下民。祇荅神庥。益見蘊蒸土德。作陝
東西之怙冒。周召一身。爲嶽嵩華之主人。甫申
再世。出謨猷之餘緒。遍增舜典光輝。轉元氣以

保釐羣萌畢公弼亮豈止摩挲金石考補荒殘
藻續山川淋漓歌咏也哉文徽希守司州叨蒙
大廈錦巖夙眺攀紆道而神搖赤鳥追隨躡神
霄而氣壯覩林繮之重煥負弩增榮聆訓誨之
殷拳中圻布化惟勉旣心慎事體元臣保乂之
忱更隨巷舞衢歌上樂職中和之頌謹賦五言
排律六十韻用紀盛事惟大人實垂訓焉

今代周申甫依然嶽降生奎文兼將相勲業兩都京白髮
變民切丹心報續成瀾安河效順渠浚野催耕手轉洪鈞
紐元調玉鼎羹瀾綿施潤澍紛匝普祥雲
星罕臺懷返繫韉道左迎敷陳

顏有齋寵錫句新賡

賜服黃襜褕分樽紫玉瑛班聯隨豹尾章采映慈旻
帝曰嵩靈厚當年望秩榮初冬畱藻翰四日奏韶箴指畫
山川記丹黃歲月更修禋須大吏周視況工程奉

命訊維吉乘時利用征恰逢新雨透遙指曉霞頰映柳前
騶減穿花從騎輕麥肥搖錦浪棉茁勝芳蔓黃蓋標中極
璇宮麗八紘樹蟠蚪蜿蜒鐸颭鳳琮琤醴帛虔將俎狸沈
肅戒牲旃檀霏畫棟袞冕降雲駟身是王朝翰星原太乙
精感孚元老事忠信雅懷清神廟多凋剝華坊半折傾畫
圖親指授鳩尾壯經營層構增篤瓦崇軒補繡棚鐵人扶
庫立鼇柱聳天擎四岳祠旁撤中峯廟正楹盤梯添穉樹

周垺鞏嚴城。壇易薪標列。階環釗城明。陰陽歸翕關。呼吸
氣含宏。前制仍恢廓。新模更肆閎。無私通胖蠻。有報在豐
亨。少室西雄傑。羣靈內合并。跋陀臺露滴。初祖石霄暉。會
善聽泉響。仙娥見闕橫。山花開躑躅。林鳥轉倉庚。遂詣嵩
陽院。長懷伊洛情。紫薇腮綽約。漢柏腹膨脝。講舍重規地。
經儒舊列名。定知鵬展翼。還頌鹿歌華。華蓋天門峻。旂繆
御輦行。

龍章懸絢爛。螭篆望嵒嶭。崔導坡公至。雲開吏部誠。千崖
舒積黛。萬壑掃新晴。玉女窻全啟。青童旆夾縈。鐵梁飛舄
上月鏡。拂衣鏗公猶登嵩頂帝座高通語。魁杓朗照衡。黃河拋
襪綫。蓮掌想霓旌。公任陝撫時曾登大華絕頂作登華志一篇直倩浮邱伯。遙

招衛叔卿投壺曾箭括揮墨又蓬瀛見大心能泰居高氣
不盈何須搜瑞壁豈待飲金罍屬吏慙樗櫟鴻慈荷厦帡
追隨思撰杖縹緲聽吹笙歸喜攀轅隊回聽搗帛聲行厨
推墨寶野老進朱櫻風雨三時順川原百彙貞經綸台輔
業永慶泰階平

大雪偕永嘉周西翔蘭谿柳塢齋尋青田韓介圭
淨業湖寺夜飲各賦排律十六韻

風勁雪飛號冰湖半咽濤衝寒增意緒挈伴快遊敖浩蕩
人才會崢嶸意氣豪談經憑尊席得句必爭袍都講聲名
並司成賞譽叨雲龍僅相逐羔雁恥同操戰各提旗鼓閒
如解纜繚入門攜手熱促膝擁爐高酒渴傾囊急僮僮走

市勞盤餐無次第。歌嘯任譏褒。也復堆綿爵。兼能砍玉螯。
昆陽轟掛鬪。雲夢快吞饕。推戶騎鹽虎。翻身踏海鼈。病僧
時駭起。凍雀可憐逃。拈韻揮長律。移燈舞佩刀。長安文字
飲。只合屬吾曹。

咏鼻煙廳公平方伯索

西洋傳名煙。厥味受以鼻。種超淡巴菰。品埒波吉利。其屑
金絲薰。其色檀心細。露灑薔薇潤。葉藏貝多膩。堆瓶綠玻
璃。拭布絞節智。

天朝始珍賞。澳門列海肆。分自婆蘭舶。臺岡相飴餽。寶玉
鏤壺圖。錦繡飄囊繫。把持鏗几案。出入鬪袖袂。臭味不差
池。同心若蘭氣。取用重刀圭。呼吸在息吹。麴塵黏滿指。百

末香盈幌掃垢化查滓。辟寒免歊噫。觸無蔡澤蹙。捉比謝公異。豈徒鼻觀清。兼使神池衛。灌頂等醍醐。天眼發智慧。遠殊呂宋產。吞火灼肝肺。欲將莊生醒。決彼世人璵。何時載食品。補入東京記。

食甜橙作

來遲離支天。別負江珧候。海上對旅人。何以慰邂逅。甜橙新會果。產少品迺首。先霜磊砢垂。經雨團圞皺。盈筐走犀紋。裹箸惜鶯脰。香取羅帕揩。滑隨玉纖鏤。秋筵擘鵲殼。新酣須重釀。冷然九雲腴。心脾皆滌漱。胡爲禹篚遺。致使麋衡漏。壓市盡綴江。徒伴禾雷柚。贈名以佳士。溫潤而縝秀。如彼文學人。爽味入襟袖。莫移淮北枳。空點吳鹽陋。他日

賦上林價尊漢臯棲

食淮鮮作

名淮鯉又名淮鰈淮河烏龍往流二集皆產此
往流更美

支無所鎖後水族出淮多黃雀秋誰化

述異記淮水中黃

蟠龍事久訛

起老學菴筆記淮灘雷雨中一蚌有鱗爪跡忽

鯉名緣近

似鰈比亦殊科

獮殼騰珠雪柔肌耀玉珂

色白

正當寒雨

後羣集往流渦

鞭借厨孃手

閩人入湯則脆美俗名鞭鰈

攜網戶過汁甘萊菹潔腥斂毫薑和菽乳旋圓柱水磁映

白醯昔曾餐海月更記醉香螺

宰潮海時水族海月香螺二種品最上海月即江珧

也性鱗盡欣逢此人歸奈若何老饕耽釣侶佳味說漁蓑毛

勝加恩簿應增韻士哦

訪淑菴觀察楚旺新運次周覽形勢今昔異宜喜
溢乎辭得五言排律三十六韻

天府供儲急神州粟麥豐委輸由衛北飛輓出山東吳瀆

泉多絀淇源脈亦同聞難謀啟閉灘孰濬深洪羅勒常分

貯漳涯未擴充醴渠徒自擾利漕竟誰工漢建安中鑿渠通漳水入白溝

日利漕口晉穆帝於小澣鎮置運次又於白馬津漳涯等處立邸閣皆在今彰衛兩郡之間前議烏陵

隘旋移楚旺雄白溝安邸閣黃澤聚朦朧直占羣流匯兼

隣三輔衝便民爲轉易計地稱庫隆觀察來持節勤勞矢

匪躬逢時興美政督運促成功去臘舟過德元正旆抵通

共誇登庾早不用鑿水冲入奏

天顏霽憑軒溫語蒙祝釐隨紫陛溢道看花驄入郡徵財
賦九秋納耗稷耀卿歸汴土韓滉出關中囊橐駢闐集車
牛塹圻濛旗開筐簇簇籌唱鼓逢逢非獨科條減兼之斗
甬公勾稽嚴抑勒節級酌圓融片檄催軍額千艘拂濯叢
篙師歌弄月漕卒嘯帆風氣誼君彌摯豪遊我未窮騎驢
趨幕府捉席對山翁大陸寒雲白水臺落照紅晴漪搖雪
鏡夜火耀星虹津蟹膏浮白河鰕膾剌慈手傾濃琥珀唇
破小玲瓏遐覽周燕趙遙懷繼維嵩茲行真躍躍欲別莫
匆匆爲就三閒屋將移一畝官漕解質民居湫隘蠶塵觀
察將捐俸建署於隙地庶
官民兩便廣場容展布爽塏得尊崇計費無煩擾鐫廉本素衷
稍謀息賓客隨意作房龍規畫光今古謨猷徹始終穹碑

紀異績還上大司空

同人集岸花詩社修禊賦五言排律十六韻

佳會招邀徧春光取次融永和修禊古癸丑與年同觴咏
能爲主鶯花不負公秉蘭墮浦日轉蕙喜江風聯步隨珂
馬嬉遊雜錦幪袍拖垂柳碧履印落桃紅吳越羣賢至湖
山一社雄三千餘里合二十五人中蘭亭集識成者二十五人促坐階
無隙分鬪韻不窮牆搖修竹影欄倚牡丹叢彷彿清湍響
依稀曲水通扶筇來老衲捉席費奚童豈待含毫腐何勞
擊鉢功談仍霏玉屑唱亦聽玲瓏傳去藤箋疊書來繭紙
工罰觥渾不用共掉百船空

題朱礪東歲朝圖

旭日瞳矓啟光風次第酥堂懸金縷勝戶挂赤靈符椿幹
高標迴萱花淑景敷龐眉知彩集綠鬢襯顏腴綺席欣同
據鳩筇不用扶雲開三素色春靄九垓爐婦叟迎年珮兒
擎介壽盃兩行分鞠脍二老俯歡娛繡祿懷礪玉紅墀鬪
蠟珠含飴攜手笑五彩稱心俱吉語芻尼報亨衢渥驥趨
鼎紅添宰堦酒綠熟屠蘇天意綿忠厚鄉評重友于善門
祥所降仁里德之孚蘭茝抽林屋梅花滿太湖太平欣有
象請看歲朝圖

江峙山封翁八十壽詩五言排律一百韻

黃嶽鍾奇氣靈樁蔚大年考成華胄衍江左貴宗先學術
瑕邱盛詞章秘閣沿統靈稱麗藻道績茂芳荃秀攬烏聊

最光凝淮海全者儒乘運出碩彥應星躔巨孝貽多穀
朋贈半瓊花開五色簪璫直七絲絃玉孕崑山璞珠含禹
貢蠙文彪而藝祿京鍊與都研雅量欣汪瀚宏材納滴涓
醇醪稱友誼山水訪行纏型俗懷如一閑家法乃專屏風
常錄誠古訓自鈔編陳寔鄉評著徐陵族望聯睦婣周戚
郇推濟及華顛靜悟涵濡澤應知感召緣義方誠懋矣餘
慶豈徒然敎子韋經富承家魏笏傳汝南緄繼爽唐室綽
齊權偉器儲台輔鴻聲發槩鉛錦舒舜吐鳳雀集講銜鱣
簠羽戎臺選蜚英畫省連軍機飛禁闥蠻徼靜戈鋌露布
功馳檄豐貂飾戴蟬九賓榮典禮五輅肅旗旃
帝曰能襄事端由克紹賢

龍章頻下賁，鸞紙每高寒。翠軸霞綾燦，瑤書碧玉鐫。褫躬
彌式儉，居里必將虔。撫德如虛谷，謙冲若止淵。期頤應有
肇，元契那須詮。岳牧資康乂，河山賴棟桡。重臣藩蒞豫，劇
地旆移滇。作翰謨謀格，承歡月紀延。荷毗殷密勿，秉察重
衡銓。中土災氓瘠，神州望眼穿。恭迎

鑾輅喜，仍起鷺車還。叔度來何暮，東都迓共闕。郊俱看露
冕，戶不卜筵尊。撫輯慈衷摯，籌規俗慮捐。振窮甦積困，借
種卻拘攣。轉憶旃蒙歲，還將盛事宣。

一人隆寶算，千叟啟珍筵。

星詔頒邦浦，蒲輪過宋鄆。雲開薇署朗，區奉絳韞孃。父老
瞻儀範，冠裳效被褰。早知受茗串，更與酌廉泉。朔雪徐辭

汴春暉早到燕驊騮衛隊健。颺鳳入班。翩拜舞
彤墀下趨蹌。

朶殿前圖呈昴宿老珮曳地行仙。晶餅和綾裹。瓊膏帶桂
煎。銀罍脂飫醴。虬箭漏聽蓮。饋僧儀遵古韶。韻樂在縣。捧
來靈壽杖。攜放潞河船。厚福深包孕。才能大斡旋。我公歸
美善。益以廣陶甄。四野猶瘡疹。羣黎尙粥飧。報親忱鬱勃。
體國志貞堅。

褒語公忠正。

恩綸卹賑蠲。焦勞勤煦嫗。稽勩遍村塹。騶從無多騎。行囊
只一肩。雁鴻安集止。鳩鵲免遮還。是用酬。

宵旰。其誰敢削脰。提撕當鉅任。感激奮微員。元氣調金鼎。

耀璧瑄藹如仁者語卓爾使君篇讀浣薔薇汁膳煩窮膾
煙咸欽心似水羣仰筆如椽況復佳藹兆欣逢並蒂妍麥
歧攢穎秀榴實壓枝駢花定名旌節松疑對偃佺九霄滋
寶璫三瑞寫芸箋持以爲觴侑圖之入冊鮮帶圍呈綢緞
乘服映褊褊豐歲繁霖雨奔濤溢大川何勞瓠子嘆早豫
水衡錢畚鍤徒皆聚隄防候豈愆樵焚周孽畫楯提竭既
併合轍功方蒞從孟勢則圓精誠通昊緯濁浪下深窰正
值成功日遙逢祝嘏天傳經人八十計算鶴三千聞說神
明勝依然步履便時游蓉泝外獨上蜀岡顛棋關紅梅豔
樽開芍藥田陽春生几杖妙性

劉淑菴觀察六十壽五言排律五十韻

賀竿綿千禩，鴻圖會八寅。
臚申純嘏祝，齊籙上儀辰。
維豫誰將事，知公荷首掄。
驂駢行赫輶，繡服耀璘霏。
再覲天顏喜，重蒙運續詢。

溫褒傳異數，舞蹈奉清塵。
綺苑開瑤島，華池接錦闥。
樂聽韶奏朗，袍染

御香鮮臺閣千花麗共球萬國陳鳧趨欣濟濟虎拜羨彬
彬盛典虔誠蔽遄歸職守遵福星臨餽次天胄照神圉仍
以廉平矢兼之調發均已過第五錡直繼鮮于侁日月光
分被雲霞氣沐醇醞壽方協甲嶽降此生申壽宇多耆彥
洪鈞普外臣增年儒術富報

國壯謨伸伐鼓繁陽野催艘粟窖津庭喧心似水棹唱
如春

紫誥垂蕤鳳斑衣戲玉麟賢勞應受祉鎮靜夙懷淳孝友
傳先德文章蚤致身才能魁粉署名已記

楓宸宅簿脂膏卻中臺薦剡頻一麾辭冀闕雙鹿擁河濱
是運連荒歉來時急撫循濬川躬畚鍤灑血慨耕耨出每

衝炎暑憂無間夕晨承宣敷

聖澤履勘遍孤貧步禱擎孟上所壇降雨勻煮糜招雁戶
賜贖卹鳩民祠創唐賢煥堂開宋學振丹黃嚴矩矱紉布
廣陶甄頌在編氓口言從執友真卽今顏渥赭早日鬢生
銀轉漕

恩加擢飛芻捷有神烝徒皆踴躍舸艦不逡巡定見遷劉
晏毋令借寇恂花呈旌節瑞品重廟廊珍愚也淹羈旅賢
哉倚主人一經慚史席六載惜勞薪病藉依鈴樹狂容岸
葛巾高眠徐孺榻爛醉夏侯茵涸轍知蘇鮒歸思起戀蓀
喜逢蓬閣會來赴白溝濬醪酒添霜蟹水厨足雪鱗牙籌
停政暇樺燭快文論韓圃深秋菊坡詩合抱椿願言堅晚

節四海懋經綸

題劉淑菴太守讀書秋樹根圖

使君居隣楓門山。仙都福地相迴環。都梁江頭讀書處。千
章秋樹浮紫殷。一朝騶鸞謁帝宮。恒春貢樹上林紅。簪豪
太乙分慈藹。退食衣搖蘭茝風。誰與貌茲秋樹爽。令我展
之神先往。枝擎虬龍根。踞虎蜀錦吳霞澹。真想中有人兮
芙蓉裳。石床草芻平如掌。涼風入幅氣蕭蕭。一夜聚吟萬
山響。想見掀髯箕踞時。六經果腹雙瞳明。卽今出作河南
守。莎廳老幹交窓牖。孝綽詞華校課心。穆之聽斷神明守。
公餘觀稼一登樓。紅葉山山當闕口。吾聞河南之守由鴻
儒。吳黃貢召治行俱。今年此邦歲荒歉。勞心撫字霜生鬚。

圖中讀書景豈異嘉樹欲遍植東都誰描白傅屏風樣兼
寫甘棠聽政圖

題岑鼎齋紀夢圖

岑鼎之夢何奇詭岑鼎之圖遊戲耳當時此鼎以贗傳真
者亦已飄雲煙魯吳壽夢鼎何在攜歸三晉隨流遷自來
楚國無分器誰使精雲移此地神官巧借互資緣博物諾
皋荒載記愛此鼎圖作齋縱橫話古權作達招朋儕湖山
三更風雨黑蒼茫萬古飛入懷鄉媛奇書列滿架移家思
傍湘之涯吾願君學蕭子雲手追道德經一卷鑄金璀璨
江之濱又願學王右軍盡錄生平篆與隸書功借鼎垂秋
春此齋此圖爲椎輪尊蓋藝絲來紛綸長虹躍波蛟龍捧

摩挲更著斑斕文。

番行篇

廣州舶市十三行。雁翅排城。蠶綬房。珠海珠江前浩淼。錦
帆錦纜日翱翔。蜃銜珊瑚樹。移瑤島。鮫織冰綃。畫白洋。別起
危樓濠鏡倣。別營奧室賈胡藏。危樓奧室多殊式。瑰卉奇
葩非一色。韎鞞丹雘箔對圓。琉璃綠嵌牕斜勒。莎羅綵繡
天中裊。碧玉闌干雲外直。迎來舶主不知名。譯得舌人是
何國。何國虬髯鵬耽兒。金衣借問欲驕誰。平價能諳吳越
語。留賓也識漢唐儀。銀錢鑄肖番王面。玻鏡裝分花女姿。
繞檻紈牛和露犬。委階瑣袱與駝尼。駝尼瑣袱焉足數。篤
耨奇南隨意取。蓮花鐘測日東西。百寶表懸針子午。亂擲

蚡巾蘇合膏倒傾黃紫蒲萄乳水樂教成小鳳皇風琴彈
出紅鸚鵡別有妖徒連臂趨吉貝纏身鶻縛窄懷中短劍
大西洋袖裏機鎗法蘭錫黑水龍奴荷銃嬉紅毛鬼子蟠
刀拭紅毛鬼子黃浦到納料開艙爭走告蜈蚣銳艇槳橫
飛婆蘭巨捆山籠罩相呼相喚各不聞或喜或嗔詎能料
舶商色喜洋商快合樂張筵瓶碗賽何船火齊木難多何
地駝雞佛鹿怪散入民屋旅賈招居中阻僧公行大公行
陽奉私飽橐內外操贏智相若湖絲粵緞彩離披甌茗饒
斂光錯落頃刻檀梨走九州待時琛玩籌奇作此時公子
擁花遊此際妖姬倚舫謳願學鴛鴦繡羽悅願爲嬌鳥挂
金鉤那得秦璫都壓鬢生憎火浣不纏頭永清臺上鼓打

急山動波翻雷雨立鎮海將軍洗礮歸征蠻都尉收旗入
轅門犒勞立斯須澳口回船查引給回船只順北風去灑
淚休辭淵室寓但述

天朝權稅輕但誇中國農桑富沉香官是吳刺史卻賂吏
同孔節度鯨鯢無窟廕無氛

聖德柔懷萬萬春明年好換新房樣更有遐方來問津

題姚雲岫方伯螭坳侍直圖

彤雲曉捧明光宮豸冠鵠立花磚紅文章風采在朝列字
內已仰姚梁公袞職太平無可補作天喉舌爲心膂民瘼
時陳陸敬輿大體獨持孔道輔一夜封章問曉星八荒明
日皆霖雨

御書數下南臺長。六曹糾察資忠諒。繡衣赤棒誰與儔。司隸威儀肅城仗。出騎驄馬萬人中。入陪豹尾千官上。以此倚毗重。

恩澤江海旬宣周。召伯蒼生每仰驚。車歡錦袍只帶螭。煙色朝天臺上天尺五。春風吹霽紅棉雨。袖裏隄塵

賜管香。夢中銀燭鳴珂路。展圖諤諤思昔時。鳳皇儀羽夔龍姿。生來瓔珞百寶相。披得長源一品衣。丹心不改顏不老。回看省樞豈鴻爪。寢興猶悶溫室樹。冊府久傳諫林草。紫薇花彩今敷腴。行將密勿陳訐謨。他年赤舄登綸閣。重寫金門待漏圖。

題海寧家憩亭松下讀書圖

吾曹安能學倥傯青羊公。餐脂服實雙方瞳。羽翼膜胸騎
長虹。但願繞屋栽松三十樹。朝夕攤書歌嘯亦足百城雄。
不見吾宗讀書者。行冊貌之古松下。中原多栢松則無。自
把胸懷借抒寫。月澹澹兮流襟風。疏疏兮入琴。松贈君以
鳴絃急管之韻。君酬松以黃鐘大呂之音。肘金腰艾那可
得。壯作奇男老賓客。百年此日日足惜。養之經書子史以
爲壽。味勝手斲茯苓煮丹液。況此銅皮鐵骨人。嶮崎磊落
摩挲親山色。溪聲自今古。青鞋白袷無冬春。展之東閣梅
花樹。對以南陽菊酒尊。松耶君耶雨不辨。惟見讀書奇氣
飛騰河嶽化作蒼龍鱗。

和靜山邑侯鳳竹菴小集賞桂花用栢梁體二十

五韻

桂叢佳什傳琴堂琅玕矗立秋字蒼天機揮灑難測量如
來金粟光燄長主持風雅來吾湘簿領儲倚無迫遑暇攜
賓佐行郊場吏捧雁幘僮擎觴團團翠幕不見陽霜娥顰
滿蟾窟香佛雲在下風微揚蚪根紛掣龍甲張□□衙衙
□□行九枝燈擎列兩旁迦陵隔院鳴笙簧霞飛墨瀋蟠
中央才人不是酒人狂岸幘起舞夫何傷龍涎歸滿芙蓉
裳黃山異種移幽芳百年薤草話杳茫不眠吳質思徬徨
更欲花下彈空桑老僊游事怯高涼吟公詩篇循書廊

賀歸德歸太守陞任濟東三十韻

東南秀毓虞山最四百年來盛門第尙書身出應昌期舉

夔德業台端貴輝煌

國史紀嘉猷赫赫家聲傳詰訥使君雄才夙所秉驍驍早
向天衢騁河渠剔厯備勤勞疏濬隄防得要領每看借筭
中機宜定知筵羽登臺省宋州彫翹初舒後使君振作治
居首斟酌盈虛費苦心勾稽疲弊煩神手野靜鴻聲飽宿
糧地歸雁戶譴龐叟況復整躬以率屬脂膏不潤門庭肅
垂簾政暇坐焚香判獄如流深秉燭漢家循吏課廉明豈
獨無華稱惆悵

天子需材儲大用制軍薦剡選於眾五馬長安夾道看
御屏名姓親書重不染外官習氣言續書天下皆傳誦平
原疆場接畿輔三齊分制誇雄府

帝曰欽哉汝世臣賜汝英函往綏紂周書孝友策君陳渤海褒揚繼虞詡經綸大厦宏遠謨作翰維屏共延佇汴京公解長河口鞭絲帽影聯辰酉千仞人知壁立高五年余荷襟題久附交幸已快追隨疑事咸能爲決剖預聽來暮遍輿歌更喜著鞭先良友三月桃花東陌多離華遠映明湖波使君赤旌行逶迤隨車甘雨春疇和相思難雜白玉珂相別頻酌金叵羅七十二泉清無滓使君之心仍如此願崇明德珪璋比願堅晚節松栢似他年曳履上星辰盛業韋平踵前美

祝梅軒學長暨德配周孺人六十雙壽

祝融峯陰秀拔起鑒翠流丹瀉涓水碧泉香滙隱山泉瑞

氣慈龍百餘里此間相望幽人廬長松修栢交扶疏蟠根
仙李更豐蔚聚族而居皆讀書雄文績學精典籍屢試前
茅稱巨擘昌黎鴻博未蒙收太白豪華自稱絕古賢不必
矜科舉鄉貢之名重天府皇家立賢更無方待聘席珍皆
璧琥卽今人號鄭公鄉弟子談經列兩行盈門桃李蔚然
盛明港都滋翰墨香何況敬宗收族務家乘祀田羣景慕
鄉人事畏彥方知德星光識太邱聚有子講院從余遊少
年文筆勁且遒一朝手捧金箋至介壽新詩再拜求白頭
雙舉梁鴻案膝下斑衣環燦爛酒斟南嶽綠瓊酥客萃武
彝錦亭幔經師漢代多壽考耆德懿徽同不老何時扶杖
一登堂擘脯網魚伴芝草

題廬介軒太守琴城課士圖

琴城課士之圖題滿帙使君課士之事我能述南豐古州
倚軍峯盱江日夜流紫紅琴臺片石橫龍窠氣鬱而秀人
文雄使君創書院高朗踞其墉讀書巖前程山東文昌一
壘懸當中盡收五嶺雲浩蕩羅心胸甘泉湧地樓插空百
窓燈火蟠星虹春三二月天清和柳袍桃綬沿隄多使君
蒞止鳴金珂香凝畫戟簾捲波諸生魚魚珮娑娑立階索
筆分曹科使君坐領春風席兩行肅穆塵囂寂深叢界兀
見孤罌甲乙鉛黃大決擇此邦人士頗難馴毀譽猶存三
代直惟氣剛大心光明能令羣材就繩尺馬遲枚速各任
之蟻戰酣聲鸞鼓翼授餐揚觶日斜時尙欲吐奇酬教澤

滿城觀者競絃歌。此圖一一生顏色。惟有經營一片心。丹青難寫辛勤力。二十餘年蹤跡久。使君欸客洹河口。展圖畫錦講堂邊。相對挑燈皆白首。使君卓薦行入都。家聲繼起在須臾。課士之事無時無。當令萬間廣廈千舍區。大庇天下寒士顏敷腴。不見黎川學鷺洲院。新城吉安雨書院皆使君所建志乘貞珉傳者遍。經師循吏偉丈夫。欲識使君丰采看此圖。

祝河南大中丞壽四十韻

伏其名

三關嶢峩撐空晴。長淮水暖鄰鄰清。胎簪大復互羅列。彤雲千疊護蜺旌。一星南極正朗朗。遥瞻瑞氣連台衡。公才入桂林中列。碩輔大賢秉圭臬。范家羣從皆循良。許國一家盡英傑。文章政績兩相兼。奮跡巍科歷旄節。公之治縣

如治經撫，宜綰綬揚循聲，發粟不殊汲，內史救荒仍淮漢。
長平迷舟利涉鯨波靜，兩岸花飛聽鳥鳴，巖疆一綫通邊
圉，崇巒複嶂稽行賈，於中籌畫立市廛，南北懋遷知定所。
騾綱駝隊銜尾來，轂口綰之失險阻，成村立聚昔所稀，手
闢巉巖爲樂土，豐碑矗矗販豎歌，雙山從此垂千古，況復
城根溝路平，儼削成臯連廣武，曲江鑿道鄴侯河，偉績續
教刊治譜，公之讞獄如鏡明，纖毫取影無遁情，滇西窮谷
失鼠竄，發姦摘伏人皆驚，巨憝伏辜在傾刻，敏捷豈不由
至誠，公之澡志若冰雪，脂膏誰敢蒙，清潔河工焚榷利藪
滋獨變，勾稽爲撫卹，均分供億自轉輸，吏胥斂手民情悅
至今原武驅車行，四野輿歌尙洋溢，公之立身若砥柱，鬱

林卻載隨來去片帆獨挂橋李城何心自別縑與素當時
誰識玉壺清事過直欲黃金鑄

帝曰欽哉汝勤恪英蕩隼旗錫光灼三州九塞汝倚毗申
息北門嚴瑣鑰謙和靜鎮作經猷恂懔無華裕謀畧卽今
六十神逾旺詞詠簿書樂清貺櫻鞵布襪似儒生杞菊充
餐櫻筍餉巡行郡國只單車厨傳蕭然卻供帳晚顏玉色
萬人看丹青難繪靈臺狀早梅十月鈴閣馥紅蘭繞檻翠
竹肥汝南部吏歌鳥集江上門生唱鶴飛載叨樾蔭仰桐
栢觴擎酈菊盈青核不敢虛爲頌禱詞願公晚節貞明德
太平綏輯重名卿長爲天中扶斗極

祝仕魁學長六十壽

昔年試吏軍峯麓來往歸川道中熟錦巒繡嶂帶城原修
竹長林抱川曲古云山民壽且仁此邦風俗尤樸勤交遊
京國多賢俊入選英才識雅馴乙酉余分校江西於撫州得士四人臨川居二周
君客湘經歲月圭璧持身眾欽悅薛包蔡順敦古風洪崖
過源踵鄉哲太湖朱君吾好友坐中道君不停口兼聞膝
下有佳兒角藝論文健身手昭陽之歲孟陬辰籌添海屋
花甲新惟聯酒客同詩士不藉熊經與鳥申紅梅爛熳後
湖繞湘蘭舒萼盼清曉何必井峯雪谷游選勝尋芳扶不
老餘慶應綿積善家脫顏玉色花生霞張老最稱善頌禱
引觴爲進長春花

爲朱礪東題九老圖介其尊人壽

角里先生今再出，縹緲峯頭好居室。胸中飽貯靈威書，懷裏時探武昌橘。康疆逢吉德之符，鵲息熊經那堪述。誰爲郎君作此九老圖，閔貞黃慎法不拘。風流瀟灑白尙書，招邀履道坊中居。尉卿之吉懷州胡，亦有劉鄭與張廬。龐眉赭顏方瞳癯，方巾縞帶曳褐裾。丰神酣爽語笑俱，僧曰如滿攜其雛。山花壽果點綴殊，惟有青天一痕畫不得。綿邈二室連三塗，我宿香山九老閣。七老詩篇耀伊洛，石樓風月氣冲融。尙有黃花與元鶴，今晨憶地觀茲圖。人生隨處皆行樂，徑擬登舟一相訪。田石山履隨所往，尙齒之會吳中多。林屋攜琴共娛賞，圖中舉似誰老人。百四十四李元爽，舉觴大吸湖天朗。

輓秦啟齋詩

長箋尙挂東齋壁。春遊早訂西郊陌。驟聞凶耗良會空。使我仰天長太息。文壇掉鞅少年時。雲龍相逐匪朝夕。自別香雲書屋中。天海迢迢異蹤跡。君才卓犖雄吾曹。腕底奔騰走卷籍。英雄俯首夫何如。安得有司合繩尺。抱貞守素杜德機。白雪聲華在鄉國。鍊經研史足平生。豈是窮愁著書客。嗚乎萬事那可測。交情死生摧胸臆。卅年宿草滿江南。淚爲故人枯不滴。今歸故里續舊遊。斯人又際龍蛇厄。問君偶疾示維摩。諸相皆空見真色。自題匾額與誄聯。大覺非因仗佛力。獨恨聲詩角逐多。咫尺永難見顏色。春波巨浪黏天黑。顛風老樹花蕭瑟。出門倚杖望茫茫。閉戶一

燈照頭白

題徐杏浦哀詩冊

展函一片淚和血灑作桃花變成纈哀猿兩岸斷腸聲使我聞之更嗚咽傷哉貧也飢驅之有米可負親長辭音容不見見几杖終天之恨何窮期湘波浩洶雲茫茫調苦什短情何長感時觸事述瑣碎筆墨屈曲皆精光循陔之樂不可復靈椿倏聽號風木門生都廢蓼莪篇樂府將傳雨雪曲我歸家園識子面如雪麻衣抱茲卷聖人詩教重天倫麗句綺詞安足羨子才雄駿不可羈報親勵志壯盛時泉京含笑自有日勿爲永隔斑衣悲

題徐節婦朱氏詩

嗣東詩人之妹

太湖風寒烏夜啼。碧窻少婦鳴杼機。織爲鴛鴦不雙栖。唧唧惻惻聲何悲。妾年十九甫結綢。翩翩海燕比翼飛。家住四壁門蒿藜。得偶文士茶如飴。爲君練裳屏羅衣。爲君椎髻卻鉛脂。剪疏汲井面色顰。諸姑伯姊識者稀。臬麻箴管勞不疲。日夜佐讀揚蛾眉。蘭膏燄燄燒松枝。妾命薄兮殽君懼。攻苦神瘁形不支。躬調湯藥進鋪糜。幫膺手滌虎子提。籲天請代天罔知。八載捐柔腸肉剗瘞。君零落玉臺詩。從君誓伴華山畿。絕粒不死吾何爲。親言鞠嗣禮勉持人。家孤雛血灘漉。移巢尙能哺乳之。妾胡難續一綫絲。補天無石媧力衰。冤禽銜土毛羽摧。君魂未杳黃泉隨。嗚乎鞠凶疊降奇。角里萬家皆涕洟。有兄才藻聲譽馳。史筆質實

光陸離貞義爲號懸謚宜我爲補以樂府辭閭書志乘請
視茲

拾翠山房詠物詩八首

此詩原本十首今缺油燕冬茉莉二首

莫上相思樹憐他翠黛低雙雙隨日上一一伴花栖舒臆

翻鸞袖香班暖麝臍燕山銜不去胡雁墻新迷

聞鸚鵡

作穗青鷹爪含苞白鳳胎絲絲垂鬢裏夜夜呢人來露帶

襦裳濕香隨笑語開一雙彩蝴蝶還繞篠棚回

夜來香

作樹成連理含苞亦共房美人本無淚鸚母亦憐香拋愛

黃金合收宜紫綺囊相思有奇木裁作合歡床

紅豆

本是湘靈質新移越女盤暖宜藏帳密秀合隔簾看香月

生文玉春風伴紫蘭。凌波有羅襪。莫畏下階寒。水仙

畫諾知無分。垂香卽是因。攤書祛脈望。食鐵比麒麟。半樹綠天色。一簾紅雨春。別裁幾十幅。笑付乞詩人。鳳尾蕉

一樹鷺黃色。珠江認柳條。新憐添淺黛。舊與搗纖腰。紅雨

採來困香雲。拂處嬌春風。鶯百轉長占赤欄橋。新柳。粵中無柳。見

珠江園亭映水。一株嫣然有致。

南國瓊枝少。移來錦帳中。明偏憐素雪。香不漏春風。額伴

金鈿小。心憐燈藥紅。梅花新驛吏。留取鳳皇叢。瓶梅

載得珍珠去。蘭舟映一簾。黃憐新額粉。栗綴小眉蟾。私語

偷香氣。柔情露釧尖。莫須雲落後。早倩午蜂黏。樹蘭

贈岳常澧觀察□□□三首

沅濱市聚倚長城築壘包崖眾力并鼓震火樓楊抗地天
連銅柱伏波營開風遠落蠻人膽勒相兼催野老耕見說
六師過祗席喜聽鉦柝夜分明
潯陽雄劇裕儲胥判斷如流特緒餘鎮鎬北門邊冊重姓
名內殿

御屏書蘭滋九畹酣霖雨樹滿三江拂旆旗寄語囊螢勤
讀者使君經術富耕畬

振興豐陽滿院
余希主一載

星城夜燭倒金卮款語豪情繫我思展誼獨憐鳩杖客溯
交不忘鵲袍時中和樂職遙興頌生計艱難應荷慈雲苑
太清聯咫尺更隨父老望旌旗

上兩粵福上公節相十首

冠代元勛世德隆賢臣繼起禁林中龍韜每奏無雙續麟閣頻書第一功星應台衡人望愜身依日月

主恩崇周家受命兼文武錫祉揚庥美召公

其一

雄師分度五繩橋組繫羌酋振玉鑣爲憲早知尹吉甫論功先拜霍嫖姚全開赤版恢王服祇以丹心報

聖朝舊是元公宣凱地摩崖兩世姓名標

其二

崇班曳履上星辰講幄從容侍

紫宸八座官兼天地職一時

帝簡股肱臣官儲清秩凝丞貴政府嘉謨啟沃新從此保

釐歸重寄泰階風雨布陽春

其三

金湔銅柱擴邊營

帝重倚毗賜鉞行五服以南皆保父九州之外盡威名揆
文奮武封圻靜說禮敦詩幕府清此日獻琛重譯至當年
預築受降城其四

寵命重膺統益州籌邊雄鎮有高樓恩周民隱唐韋相德
感夷情漢武侯祚微昔曾飛鐵騎雪山新喜遍鉏耰西山
賢輔迴翔地處處蒼黎起頌謳其五

虎符親授出王畿聲討花門大合圍千里熟籌乘地利一
師架入奮神機烽煙立盡仁能勇牛酒時頒德濟威特拜
元侯兼節相

天書褒美古來稀其六

樓船瞬息渡澎湖海窟鯨鯢一掃無丞相天威三捷易上

公祠像百靈趨

廟謨契合機宜遠與冊輝煌禮數殊
萬里島夷羣破膽英風長捲繡螯弧

其七

交州移帳壯儲胥新冊佗王款塞初
橫海盡看明組練朝天仍許從旌旗
觴擎

萬壽恩波渥班列羣藩拜舞除
屬國懷柔歌坦道不須歸作指南車

其八

昌辰韶奏霽

天顏轉應親隨玉殿班
傑國鸞邦看貢篚仙砂佛果喜來
關勛臣虎拜嵩三祝壽宇龍編海九
環更慶萱庭增懋祉
鞠衣彩映舞衣斑

其九

彤弓旅矢耀旂常

盛世宣猷帶礪長朝野共尊裴相國藩筭爭識郭汾陽雙
旌山映雲霞燦千騎人瞻袞冕光擁鑾私欣親德範敬隨
輿誦撰華章其十

元旦試筆十首

乾隆甲寅至嘉慶癸亥

行年絳縣又加一飲啖如常樂太平但借詞章娛歲月更
看子弟奮功名家能和順貧逾好心得安閒福自生竹杖
芒鞋吾早辦祝融峯頂踏秋晴甲寅

六十年前赴舉人

余以雍正乙卯始試秋闈

宦歸鬚鬢半如銀

帝留約畧安閒地天與康強著述身子弟各知儒術貴交
遊惟仗性情真雄飛雌伏原無定且對梅花酌令辰乙卯

元年元日庠祥集鴻藻鴻圖典冊新拜舞私申純嘏祝嘏
遊長趁太平民文章惟願能華國事業應須早致身酌罷
屠蘇歡一老柳萸梅萼又逢春

丙辰

爆竹聲聞報曙寒拜

宸仍整舊儒冠故人事業躋公輔後輩詞章列史官一樹
老花紅更茂數莖新髮黑爭看五辛菜是長生菜好配先
生苜蓿盤

丁巳

去臘立春雪應候今朝元日晴尤宜老夫起覺寒威減賀
客來知禮數遲四世一堂貧亦樂重孫滿酌醉何辭岸花
亭長添新署步履尋芳隨所之

戊午

花甲重逢已未年一堂四世慶春筵
歲寒已逐桃符換新

暖初回栢酒妍不戀繁華隨世好仍將健骨荷天憐豐亨
本自勤勞得更語兒曹各勉旃

已未

杖國餘年值歲初小臣焉肯謝軒車祇憑懿戚周旋密不
礙勞筋禮法疏檢點荒厨甘芋栗辛勤謀食愧耕鋤岸花
署得新亭長綠柳陰中共釣魚

庚申

六十年來磊落身重逢辛酉換庚申固知否盡仍旋泰況
是寒宵早遇春老歲起居應自愛太平風物又更新迴思
拔幟登壇日正有聲名動

紫宸

辛酉

八十二翁何所求褒衣大袖作優游筆凋墨碎狂仍寫飯
軟茶香飽卽休不合時宜酬應厭頻遭憂戚泰和留且憑

兒女乘觴日。醉摘金英插滿頭。

壬戌

太平又屆履端辰。爆竹聲喧徹四隣。野寺梅花應吐豔。園林鳥語似迎春。敝裘且喜嚴寒減。禿管知裁舊秩新。八十三翁祝

釐畢。倚閭還望早歸人。

癸亥

詠游絲四首武林詞會中作

誰從浩渺證前身。一息招吹大造因。水似輕柔天似醉。風爲魂魄月爲神。爐煙駐後知何處。朱網飄時又此巡。好是韶光自娛戲。豈同野馬與埃塵。

當年曾脣合歡枝。病起文園見獨遲。惜別心期搖颺後。困人天氣嬾娜時。柳邊弱縷蜻蜒見。竹外空香粉蝶知。欲織

春光渾未得，長空孤裊竟何爲。

拂樓重欲攔青帘，當路輕疑惹帽簷。無可奈何風嫋嫋，若爲相妒雨纖纖。花魂鳥夢憑誰繫，雲影天光了不黏。底事深牆斜日裏，妨他歸燕入疏簾。

冶意柔情莫殢看，浮生世事盡漫漫。倏來乍往愁誰寄，似有還無畫亦難。牽去落花隨水外，逐他飛絮送春殘。山橋野店時相見，贏得詩人一倚闌。

長春花

花辨如梅而色紫，自二月開至十二月。粵城離落皆種之，踰嶺不生。

不占東風第一枝，落梅開過早梅時。離邊春色人誰惜，世

外天香客自知老去空憐何晏粉別來還拂陸郎雒暖鄉
好伴羣芳國花信休嫌廿四遲

萬年松和耿湘門韻

松產羅浮獅子嶺高不盈尺槎枒可觀可攜巾
筥以泉及雨水沃之仍生他水立瘁

扶寸天然百尺倫靈芝飛節想前因得泉風展微微粒過
雨苔生點點鱗獅子嶺頭多歲月維摩室裏自冬春秦封
不受雄心在老伴先生著述身

睡蓮耿湘門齋中作

花如蓮而小午時出水開子時縮入泥中

豈是圖澄咒鉢生花分子午睡天成品爭秋水香仍出身

縮淤泥事未明好伴鴛鴦同作夢不關粉蝶獨含情霍光

園裏花如錦爭及維摩一室名霍光園中大池有五色睡蓮養鴛鴦三十六隻

朱欄東席上咏並頭蘭得齋字

滿園空谷與懸崖合報奇花慰靜懷斗列黃葵爭媚酒影

交綺石若聯釵同心臭在無言結竟體芳從得意偕隨得

騷人吳下返更滋九畹遍山齋彌東東歸行有日矣

雪蓮詩四首

固始吳生丙文自安西歸以乾雪蓮二枝貽余

云此花生塞外崇山積雪中狀如今之洋菊而

以蓮名其生必雙雄者差大雌者小然不能並

生亦不同根相去必兩丈見其一再覓其一無

不得者。凡望見此花。必默往採之。則獲如指以告多人。則縮入雪中。杳無痕跡。卽劖雪尋之。亦不可獲。土人云。山神惜之花。生極寒之地。而性熱。浸酒爲補劑。多血熱妄行。或用合媚藥。尤烈。紀曉嵐先生灤陽銷夏錄。亦載此事。惜未見花時狀。因賦詩乞同人和作焉。

天山積雪萬寒英。陸地生蓮異豔呈。

用關尹子語

鬼難風災渾

不忌陰凝陽結。有誰明非關石匣藏童異。

湖州法華寺有青蓮一枝。掘地

得石匣藏不壞童子

豈襲圖澄咒鉢名。振古窮荒人罕到。尋時九品

具豪情。

遙從尋丈得雄雌。氣類相因感兔絲。交讓駢跗空瑞應。合

歡聯蒂未情癡乾坤賦物心偏巧草木通靈理孰窺不是
分枝擊在手傳來中土只驚疑

皇圖萬里拓鳴沙小卉天教報歲華瀚海無波誰浸灌周

原多臚易萌芽搜尋肯避形徒手伸縮如逢子午花

生於泥中以子午爲伸縮涸粉萎香神也惜煩君攜問寫生家

開緘恰對日初暉拂彩猶疑雪打圍爭比陸郎花載出休
誇博望果攜歸徵將譜外詩篇好合作房中服餌非想見
永天孤採日黃皮縛絛短貂衣

祝江西大中丞壽十二首

崇禎案疑卽吳中丞紹詩

文昌星彩耀天杠海嶽雄風表大邦孫閣賢良名第一吳
公治行世無雙聲華清峻歸彝鼎丰度端凝領繡幢見說

台衡連壽極春宵明照章江

其一

筮班三世西曹重執法中臺資藉深天下爭傳魯司寇朝
端羣頌夏官箴一家有政書云孝四海無冤

帝曰欽應識祥刑經術茂倚毗早洽

九重心

其二

松柏精神海鶴姿朱幡繡斧憶當時更無超擢由師錫祇
有忠誠結主知金粟自傳行部曲竹枝爭上去思碑禹山
秦隴春嵐接還近瓊筵祝壽卮

其三

洪都控制接蠻荆開府勛名借上卿漢代循良皆九列唐
家聲望在三旌手敷元氣爲霖雨身爲蒼生應鼎衡益壽
花開膏澤遍九津春繞灩嬰城

其四

萬載山迂楚塞高先賢詞宇尙牲醪王敦教廉吏留鐘鼎

帝賜文孫駐節旄趙鼎遺翰珍同和氏璧殊勛光發呂虔刀邦

人遙指雙旌拜爭誠傳家舊締袍

其五

潯陽九派接鄱陽偏歉重煩入奏章作障三湖齊反壑嶺

天午夜每焚香巡災虞詡心常瘁賑粟韓琦事有方白叟

黃童迎軼拜歡呼具舉百齡觴

其六

老成清望益恢恢四十餘年峻節推共識有文留竹帛應

知無地起樓臺士歸玉尺攀緣絕吏自水壺沈濯來純一

堂高凝檠戟天香靜對數花開

其七

聖世恩于碩望饒便番寶笈下丹霄書因吏察文騰錦福

自天來字縷綃佛鳥正栖雙栢曉慈鳥初集百花朝和光

謙志涵濡大金鼎江鄉手自調

其八

椿臺佳節紀春秋壽嶽光連寶婺浮裙布依然漢高士瘳
繁不愧古諸侯書聲續火傳烏府

鳳詔鸞箋降畫樓鴻案百年榮翟第如公介福信難儔

其九

厚德傳家慶有餘儀鳳接翼曳瑤琚雞香靜拂雲司筆
服新繙玉律書報

國文章看後起立朝丰節似當初韋公經與鄭公笏不獨

班斚曜彩除

其十

香車省院降華裯繡服吳門到轡輪拜手兩行新命婦齊
眉八座太夫人盤匱同進瑤池酒榛栗還添玉脯麟雍穆
一堂稱盛事好將佳話紀朝紳

其十一

光風霽月浩無邊江上櫓材荷見憐蘭譜末行榮兩世永
臺清訓沐三年

國恩佇看流圭瓚家慶先忻列綺筵作誦崧高偕鞠脰永
將勛績紀歌篇

其十二

韓貞女詩六首

三十年來茹苦真堅冰爲骨雪爲神能完白璧無瑕質仍
是金剛不壞身粉字題扉餘血淚帛書封髮寫貞珉祇今
忉利天宮返一朵梅花未染塵

名門弱息一羈雌冷杼寒燈最可悲地下連枝原栢樹階
前種草盡菰蔬春風塵滿貞娥鏡午夜絃鳴寡女絲二雉
好看同出墓從今樂府有新詞

難拚衛媛殉孤墳兩代身存志勤進膳姑嫜垂白髮持
家井臼事青裙飄零烏援依所嫂長養東方盛女君此日
一樽新苜蓿酌來泉壤可應聞

休嗟膝下少孤雛鳳凰擎來也不殊母訓克遵毛少節父
書能讀庾肩吾當歸遠道誰將藥訓課空房自辟繡泉下
良人應瞑目祇應重寫瑞筠圖

當年時讀女貞歌剡紙宣毫墨瀋多書似茂漪知豔小學
如班媛奈愁何無瀾古井魂長照欲刻南山石不磨冰錦
襲來煩後嗣好將珍重付瑤娥

遂如貞女墮樓時昭代襄陽迴絕奇可惜淒涼彤管日不
逢照耀紫泥時一身天地完清白萬古風霜慎護持只有

西湖明月在年年長與照心期

畫桃花二絕

寫入黃筌筆千枝歷筵繁渾疑仙苑路或是武陵源
繞宅猶多樹三春盡有花他年抱孫立醜面作光華

題朱礪東自寫歲朝圖三首

拗出寒香玉一枝彩毫如意藻紛披神仙富貴嘉祥集
合稱高齋獻歲時

雪裏芭蕉事有無才人奇筆自嬉娛心花盡湧徐熙墨
不
是尋常金勝圖

連舉天涯百歲觴高人仙子共花王配君新作蘭禪妙
春
滿湖山兩草堂

題張二雲所藏朱礪東坡朝圖二首

才人妙筆作詼諧，秋菊春蘭可並儕。
好報前年岑鼎夢，中懷飛入讀書齋。

古人三始從來重，吉語嘉祥任意爲。
滿室濃香兼淡態，詩禪畫偈總相宜。

劉梅莊以朱礪東臨別所贈墨蘭扇索題二絕

包山詩客今歸矣，湘浦煙雲任繇漫。
惟有墨痕留不去，幾枝披拂扇頭看。
應是同心臭味真，寫來翼翼見精神。
湖山舊社思同到，更憶幽芳竟體人。

爲家二雲題朱礪東墨蘭二絕

朱君畫蘭以禪妙色相法執緣皆空楚水湘巖皆悟境澹
煙疏雨是元功

君子之交淡如水便作幽蘭臭味親不有湘中一芳士空
香幾點贈何人

題洛陽姚山長倣古異色牡丹圖十二絕

張月波圓錦繡叢白司馬坂鞠塵風迎來魏后姚王並宮

織攢羅壓洛中

姚氏黃

壽安山上罩容紫異種移栽魏相家不是稅錢輸客看此
花開後更無花

魏相紫

潛溪寺久無存猶憶緋花坐日昏一朶紫莢叢挺出轉

技巧法是門風

潛溪韻

貌青巧樣費安排單父新懸作彩牌擎出天孫青玉案香
風簇擁維陽街

貌青

駝駝載獻自青州賢相坊中貴客遊淺白深紅隨日變繪
成錦幘最風流

鞋紅

疑是真珠萼綠華碧衫天水染瓊葩休言蠟蒂封時巧富
貴神仙自一家

萼綠

葉底紫名名特奇開如濃墨壓繁枝應教造物深憐惜風
雨因他十日遲

墨紫

紅藥青蚨一簇攢狂香浩態倚雕闌花王昨夜開仙宴捧
出當筵赤玉盤

蓮華萼

現出楊妃指暈融淺紅瓣杪透深紅爪痕槁李傳西子一

撚都移造化功。一撚紅

九叢赤湧碧玻璃。一顆真珠點最奇。腮玉唇朱垂甸葉。楊

家車子鬪諸姨。九藥真珠

織錦臺前豔色肥。萬神特地鬪芳菲。揚州近侍何須較。金

綾腰勝玉帶圍。金綾腰

吐出檀心滴異香。萼紅倒暈色非常。如何地氣天工巧。富

貴花鍾獨洛陽。檀心倒暈

秀江舟中戲作絕句八首之五

袁州四月無秋水。一雨江流便太顛。客舫何曾安穩睡。三

更移到郭門前。

三年笮簪挂蕭蕭。閒煞鷓鴣倚短橈。袁州魚汎不盛。漁見人多有陳餒死者。

說紅旗鉦鼓急東風一夜長魚苗

大麥垂垂燕麥黃小父彭魄上郊場居民只說觀音土不

及薰風十里香

數年前江西大旱南昌諸山產觀音土甘美可食如芋賴以活

山轉灘高怒石長機舂無數響斜陽舟人乞命篙千點村婦攜兒雪一筐

青裙推髻伴連翩也有笙歌徹夜闌四月閒人容易得燒香齊上武功船

珠濠曲八首

雁翅城中潮候齊牛欄門外月痕低郎心爭似珠濠水一半東流一半西

金珠犀象一條街濠畔繁華自古佳燈火夾城三十里遊

人齊說小秦淮。

佛桑紅漲水淒迷。繡戶誰家鸚鵡啼。休問張喬曾住處。梅花墳在白雲西。

犀簾夾岸麝沉香。花繞燈船月繞牆。今夜木魚歌臘在。隔濠猶唱妹思郎。

香鬟一尺展雙搖。黃果欄前簇翠翹。齊向金華廟裏去。素馨燈滿大觀橋。

太平橋接粵橋長。小舫如梭出入忙。海上波濤連歲惡。載花休過十三行。

五月珠潮膩滿城。家家打鼓吹銀笙。大忠祠畔南園社。濠水至今清復清。

經畧曾通刺史流年年風浪不須愁
我今吳入郎祠畔
女手閒作畫樓

無題五首

小字生時署六如
就摩再世或非虛
返魂無術音容杳
羞得丹青髣髴餘

團蒲誦偈坐深幃
茶褐黃絲學道非
三十年來奩笥罄
可憐猶畫嫁時衣

悲花忍草欲如何
兒女恩情悟刹那
知願椿堂增壽考
暗中一卷乞摩訶

曾寫金函伴寶瓶
蓮花香口熟通靈
如今祇剩維摩在
白髮孤燈夜誦經

白雪身軀任去來。早知迦葉等微埃。叅他精進波羅蜜。彼岸回頭亦快哉。

安人臨終語余誦金剛偈回頭卽是彼岸

鬢仙曲三首

鬢仙姓劉氏字碧鬢廣陵人隨父戍邊爲吳中某開府所得以抑鬱死埋雞柵下後降乩幕府詩辭淒惋衆具棺葬之虎邱眞娘墓側

千年薄命只如斯。賴有風流絕妙辭。好倚紫簫吹一曲。秋墳不唱鮑家詩。

地火風災兩不傷。桃花小影土花香。祇愁長恨歌傳後。任是神仙亦斷腸。

來如月。降去雲。輕舊事。淒涼隱姓名。莫爲詞章重墮劫。人

閒知有許飛瓊

爲李生萼白題萱桂圖

韡韡者華樹於北堂亭亭孤拔神含冰霜森森者幹生於
庭除如佳子弟珮玉瓊琚誰摹蜀荃剡箋豔并丹粉低含
甘露仰承蒿簪鶴髮對之神怡歲月崢嶸大如盤厄天榮
壽母鸞迴將錫鮮比晨葩表揚清德勗哉吾徒勉報春暉
絳趺朱萼用補笙詩

題漢陽陸明府觀德圖

禮媚容樂比節心平望審聲循氣發從容帶襜褕鏗鏘佩
璫玦絳霞絡臂韞白玉裝指決不拂挺不貫蝨圍砥平草
香潔非儒將風流豈勇士懸禁懿哉表大夫之儀觀君子

之德

題鄭南溪獨坐審音圖

于于而來。寥寥而深。惻然其清。肅哉以欽。微風入松。流泉瀉林。誰掃白雲。空青不沉。露華自飛。明月滿襟。奇弄雙按。或酌或斟。泛音分調。不濫不僭。匪器所任。非德愔愔。吾不知何者操。何者引。何者散。而知獨坐者悠然見太古之心。

題畫四首

欲雪欲霜天氣。半山半水人家。一幅澹煙疏鷺。幾行衰柳殘鴉。

誰移茶甕茶牀。映出懸巖老屋。中間合著幽人。一卷道書深讀。

識得倪迂畫意蕭疏解入禪經。空浦白雲淡抹空山石氣
皆青。曾見雲林別幅虛堂古木太湖更把墨痕收盡一奩山影
如無。

題畫二首

一角雲林圖畫半村春雨人家蕉綠新開檻扇杏紅全映
窗紗。

我欲卜居於此君先坐讀其間手執南華一卷看他飛鳥
飛還。

如泰

沃

姪男

聲

有

普

孫

啟

豐

校

字

裕幹

光